



濟寧直隸州續志

鄧際昌





濟寧直隸州續志卷之十二

人物志

世家

前志列先賢世家別於列傳蓋仿史遷之義例茲仍依前志補誌各世襲之奉祀生而孔氏之分居濟寧與先賢後裔有名蹟者亦附載焉

曾氏前志載曾子七十二代孫廣菁子昭嗣爲嗣昭嗣字纂庭四氏學生員未及襲而卒七十四代孫憲祐字奉遠又字石齋光緒十一年內襲因案革職部議准其子慶源襲慶源字養泉曾子七十五代孫

閔氏前志載閔子七十一代孫昭榆承襲卒無子以嗣子憲章於咸豐二年承襲卒子慶長未襲卒贈翰林院五經博士長無子以嗣子繁柱

於光緒九年承襲繁柱卒又無子以嗣子祥麟於光緒十六年承襲是爲閔子七十五代孫

仲氏前志載乾嘉時仲子六十七代孫貽熙世襲翰林院五經博士貽熙卒子緒堃襲緒堃字載甫號在田咸豐三年駕幸太學赴京陪祀賜御論四書一部寶墨二匣貂皮二張六雲緞衣二襲賜宴禮部緒堃卒子統嵐襲統嵐字雲麓號小山光緒八年赴部考授翰林院五經博士素嗜學光緒二年倡率族衆續修里志五年謁河督李鶴年得重修在濟祖廟又以泗水祖廟傾圮易簣時猶惓惓不忘妻氏尙有賢聲籲請當道重修泗水廟宇并邀族衆重修族譜拾遺補闕踵而成之以竟其夫未竟之志數年節衣縮食復修仲淺祖廟側室氏張氏宋俱以節聞子二延年延榕延年字文齡一字壽山承襲早卒妻孔氏冷氏以節聞

時其子肇璠幼光緒二十六年暫以延年弟延榕代襲以奉祀子延榕
字蔭南因先賢林廟事屢謁大憲力爲整理三十三年以兄子成立告
退仍以延年子肇璠承襲肇璠字璞如仲子七十一代孫子躋坦

高氏前志載高子六十九代孫聯芳奉祀其後承襲奉祀者則爲七十
代田七十一代孫瀛洲七十二代孫瑞珍

任氏前志載乾隆三十年任氏有二奉祀一天申後一文運後天申後
傳懷琴曠襲至咸豐九年有懷琴孫瑜子昭忠承襲據案 搆學石後有繼

堂爲慶繼之另一支奉祀生爲仲子八十一代孫懷弼八十八代孫繼
成八十三代孫念祖

鄭氏前志載鄭子八十二代孫季成襲奉祀其後八十三代孫金鐸奉
祀

陳氏前志載陳氏後裔培清龔奉祀子修釗未龔後舉興泗代理興泗生子士選龔後以士選廢祀公舉七十一代孫錫恩於宣統二年接龔遷居州東南鄉魯橋鎮重修祖廟恢復祭祀

按濟寧賢裔十餘家惟任鄭樊三子稱士著茲則樊子自七十代孫萬春龔奉祀後又移他縣他如前志載澹臺子自中成卒後無承襲司馬氏至安元止曹氏於道光二十一年以承科奉祀端木氏自七十世孫謙授翰林院五經博士與世龔其後俱無考顯孫氏世居荆塚集後去顯以孫爲氏原子後裔前志卽無考

孔昭舉字又華號宇文至聖七十一代孫父廣基至聖廟四品執事官行誼重於鄉昭舉性敦厚慷慨明大義咸豐初髮逆踞金陵分股北擾時侍郎車克慎督辦團練敦請襄助昭舉乃議修城創築土圩遂傾囊捐輸以爲倡率土圩周圍將四十里計日興築如期成復招城鄉壯健子弟萬餘人立團營明部勒頒條教勤訓練槍礮火藥旗幟戎裝宏纖俱備時髮逆已陷金鄉距濟城僅三舍偵知有備罔敢偪豫捻連歲北

犯直抵土圩外昭舉督率兵勇百計守禦手然大礮斃賊甚衆城關賴以保全疆吏敍功入告朝命促入都再以母老辭奉旨由候選道加鹽運使銜異數也生平好讀書對於先達文字出貲刊刻先後刊州先正高慊齋如岱遺著金鄉李固村壘輯金鄉縣志摹印會稽宗觀察稷辰躬耻齋詩文集歿後邑人每談及捍衛鄉里事猶嘖嘖道之曾孫繁澍拔貢生

高增來益修先賢高子七十一代孫歲貢生教授三十餘年成就後學甚衆比年踰七十與馬醴泉夏笠舟諸老友仿香山之會賦詩飲酒以自娛時論高之年七十有七卒子爲震增廣生姪爲漢舉人

仲緒鐸字警世歲貢性耿介教授後學以戒浮崇實爲務儒林重之仲延仕字清臣光緒二十九年舉人明年成進士以知縣分廣西未通

籍時重修族譜多所纂成惜享年不永士林惜之

仲翰屏字价藩少孤母馬氏教誨撫育早年入庠性純孝事母惟謹每得甘旨必歸以奉母雖道遠不辭人以爲能守先賢負米百里之訓焉
仲延甲字鼎臣光緒末年約族人延茂肇培修仲子祠

陳興泗字魯泉先賢陳子六十九代孫代理奉祀生性狷介事親孝其父晚年嗜酒乃專買衛生酒以供飲恐多飲致疾值父飲酒過量時輒跪父前婉言勸諫且時廢寢食以感親心孝行著於一鄉

以上采訪册

曾紀瑚字六華宗聖裔世襲翰林院五經博士同治十三年拔貢生嘗讀書別墅有奔女夜來正色拒之卽以次晨歸故里遭父喪嘔血數升幾致不起孝行爲鄉里所稱宗聖廟殘缺丐上官題請頒帑重修又以補修宗聖書院謁見當道染暑疫疾革猶囑其子曰母以家貨而缺祖

母奉養母以租薄而減先人祭祀毋以力微而忘始祖暴露爾其勉之
其後宗聖廟及書院輪奐一新皆貽謀之善也著有萌麓詩草南遊紀
略

曾衍謙字六吉南武山人事親以孝稱父年九十有三衍謙年逾七十
猶朝夕不離親側每奉親遊於山巔水涯以娛親志工詩善畫著有東
田詩草其楓葉詩尤爲人所稱年逾九十卒子興階四氏學廩生候選
教諭

曾傳錫字綸三恩貢生性孝友事母仲太孺人常作兒童嬉笑歌舞以
博親歡及與諸弟析產凡已所應得之物必先推之於弟而自取其餘
逢歉歲外境携子女來依者甚衆傳錫爲之禦強暴助嫁奩完其婚配
遠近皆稱其盛德云

以上錄
盧志

曾衍東字七如舉人官湖北江夏知縣撫民育士爲時循吏工書善畫
得之者無不拱璧珍之著有小豆棚武城古器圖說

列傳

前志叙人物仿華陽國志例無論仕隱窮達以時代先後爲序其餘則分懿行文苑隱逸僑寓方術各以類附彙爲總傳茲仍依前志纂輯之惟前志稿成後封閉學宮近二十年盧牧朝安始行鏤板又編纂人物附於後爲續志光緒中州人重修州志未果成而人物列傳舊稿猶有存者厥後宣統之季山東通志成書一州三縣之人物粲然大備今將盧志所載臚列於前通志次之其他或依舊稿或據采訪冊或本家乘墓誌列爲續編凡可以爲當世矜式以卽一言一行靡不甄而錄之庶幾善善從長之意焉

郭義洪武時累功爲燕山衛千戶從成祖入京師累遷左都督永樂九年坐曠職謫交趾立功已而宥之數從出塞有功封安陽侯見明史薛

祿傳

明補遺

孫芳近字天顏誠篤公正素爲鄉黨所服有鄰人李甲因其子無賴以貿易餘資託芳近積存十餘年後以暴疾卒其子方丐里人醵錢爲殮芳近呼之至以其父累年所積錢四百餘千按籍付之其子感泣而去其他行謹類如此子蔚歲貢生樂安縣訓導次孫式翰嘉慶十年舉人曾孫如僅咸豐二年進士第一咸以爲厚德之報

陳世良字元一事親以孝聞官山西平陽府同知自題署齋云愛養精神留此身擔當宇宙披開肝膽舍我命供獻君王王子二鴻中鈞鴻中字伯莪膂力敵過人而抑抑自下如懦夫鄉里稱其仁厚鈞字持平嘉慶九年舉人受知於翁方綱劉鳳誥其文務去陳言力追先正濟寧爲制舉文者以以鈞爲稱首尤精於易著有讀易觀象官湖北鄖西縣知縣

以積勞病卒

陳廣年字永居爲濟寧名族樂善好施丁巳河決曹單溢於州境廣年割畝易粟煮粥恤貧鄉里德之著有玉鑰詩集二卷

李田字見光其先世自河南遷濟寧田生而孝友純謹嗜學道光元年舉孝廉方正十一年舉於鄉田出嗣胞伯頗有資產析箸時與本生弟均分無吝惜亦無德色人皆稱爲古君子云

夏大觀字以中增廣生父曾乾隆五十九年舉鄉試第二大觀生而穎異工詩歌尤嗜古金石名帖家貧清介不苟事親以孝聞卒年五十子向宸諸生

閆作棟字卓廷太學生事母以孝聞年七十須杖而行每見其母匿杖而後入故作矍鑠之狀以娛悅母或小失母意母怒杖之杖墜跪而進

之作小兒態母覲然顏霽而後敢出事兄如嚴父眠食凡有所欲無不
如兄志戚黨中有大訟迭構連結不結陰爲經營至事解而莫知其所
由然或以債累起爭則揮金代償無吝色時有事要了待卓老之謠壽
八十三卒

江自新字盤箴兄早卒事寡嫂如母始終不懈撫三孤姪恩養教訓至
於成立皆爲畢婚育子女已僅一子家產聽姪恣取不忍拂其意一姊
適于氏寡且老妾出一甥復代爲撫育成人嘗於塵壁大書天理良心
四字少獲贏卽散給族親中之貧不能支者一時厚德爲里社重舉鄉

飲耆賓

以上錄
盧志

孫善寶字楚珍嘉慶十二年舉人道光元年一品廕生以員外郎用分
刑部四年補官七年轉山西道監察御史八年五月奏倉場辦理經紀

掣欠米石逾額之案與奏定新章不符得旨著倉場侍郎明白迴奏尋以所奏矛盾迴護侍郎松廷等下部議處九月奏各省兌運漕糧徵收受兌之員各有專責不容推諉遇有米色不純應查覈分別辦理並請嚴禁幫丁索費督撫宜慎委運員十一月奏請將甘肅省二卯捐例截至年終停止俱如所請九年丁母憂十一年六月服闋七月授陝西道監察御史八月巡視中城九月升吏科給事中十月上御太和殿左都御史德厚等入班遲誤善寶職司糾儀未經參劾下部議處十二年六月京師亢旱善寶應詔陳言略曰今者百姓多玩法而不畏上民不畏上由於官之苟安而不能行法官之苟安由於長官之懲勸無方昔部員奏留後即可補缺今則須十餘年或二十年逮升轉又三四年或五六年其人通籍年少尙可待時否則計歲升轉而年已邁暮不堪馳策

矣乾隆年間仕路疏通今之壅滯其故安在應請勅查辦理並於所屬
端其習尙勵其猷爲以冀俊乂日多及時自效下部議行又奏畿輔民
食應豫籌接濟豫東二省商販運糧北上所過閘座關隘毋得留難遇
有水淺之處由地方官量爲疏通俾利通行詔如所請十二月因父年
老乞養回籍十五年丁父憂十七年四月服闋六月授戶科給事中七
月轉兵科掌印給事中八月奏山東曹州府屬民多習教請勅密拏安
辦允之九月巡視北城十一月授廣東督糧道旋調直隸大順廣道因
迴避本籍五百里內復調霸昌道十九年八月升雲南按察使十月遷
湖北布政使二十年因已革知事孔廣羣稟訐總督周天爵私設非刑
等款善寶奉旨嚴訊未能鞫實降四級以知府候補二十一年英夷犯
浙江命善寶前往隨同巡撫劉韻珂辦理糧臺事務二十二年六月授

浙江布政使九月調江蘇布政使十二月擢巡撫二十三年二月英夷就撫善寶偕兩江總督耆英等遵籌善後事宜奏陳二十八條一蘇松鎮標各營應與毗連各營互相操巡一福山營狼山鎮標左營應專管福狼一帶江面無庸兼管陸汛一京口左右二營官兵應分防鵝鼻嘴圖山關等處一高資營兵應分班操巡藉防圖山關一三江營守備應改爲內河水師一長江戰船尙未造成應先製木筏以遏要隘一總督按年巡閱圖山關鵝鼻嘴江防一次一鵝鼻嘴圖山關外之江心河洲豫備兵礮以資策應一鎮江爲揚州門戶豫備兵礮以扼要隘一江甯應豫備兵礮以昭嚴密一吳淞口應備防兵以重海防一吳淞爲上海後路應豫備兵礮以資援應一江北後路應豫備兵礮以防分擾一上海地方應改駐同知一提標右營遊擊應改爲參將加副將銜一常熟

昭文二縣城內向無城守官兵應遷駐陸路千總抽添弁兵一操練水師以備巡防而資造就一練習泅水兵丁以收實用一提標副將應親身出洋考校統巡一陸路汛守兵丁應一體勤加操練一酌裁外海內河水師營馬匹一加給操巡水師口糧一礮位應分局鼓鑄以期迅速一各營遺失器械應動欸補製一沿海沿江及各要隘汛地兵房應擇要修復一慎選鎮將都守以杜灘派而聯兵情一慎選守令調和文武水陸滿漢官員兵民以資聯絡而免猜忌一消弭伏莽以固根本而免內訌疏入下部議行三月護理兩江總督六月以江蘇錢價過賤搭放掣肘請酌減卯額允之又偕署兩江總督壁昌奏江蘇福山地方形勢險要必須重兵駐守請添設水師總兵作爲最要缺下軍機大臣等議行先是御史田潤奏請團練鄉兵以杜後患而節軍需上命各督撫體

察情形具奏至是善寶奏言練民爲兵不可無統領以資約束原奏所稱令本境紳宦公舉公正有才略者有司待以殊禮重以事權等語竊思鄉兵有統領猶保甲之甲長保正也大抵讀書文弱者不能充有恒業者不能充除此而公正有才實不易得就令果有其人果能公舉以匹夫而假以事權恐非地方之福况所舉非人其害更不可勝言其不可行一也統領旣難其人或由地方官勸諭鄉民聽其自擇壯健子弟因材練習遇有緩急合之皆成勁旅不必設立練總隊長諸名目亦無庸請官操閱似可省勞費而備不虞無如大江以南民氣柔靡鄉愚惟知耕作而沿海窮民又多操舟爲業一旦責令習武旣不能舍耰耞而執戈戟又不能棄舟楫而事操防轉以官給器械貽海濱強悍之徒爲異日刦擄之具若江北淮徐一帶爲捻匪私梟出沒之地儻團練之令

一出則沿海無業遊民皆得藉充鄉兵各立黨與地方官恐亦不能鈐制必致釀成事端其不可行二也且政治之導民教以各守正業而禁以好勇鬪狠一旦使之習武禦賊未免駭人聽聞而養兵獎賞之需則又按地畝多寡攤派錢米查蘇松太倉等處賦重民貧農民終歲勤動僅足自給安能更有餘資鎮江以北賦則稍輕當此鹽務疲敝之際貧民富民皆自顧不暇如謂團練鄉民以貧保富專向殷戶攤派縱不假手官吏而恃衆抑勒無所底止其不可行三也籌費旣難何以行賞原奏稱由鄉社長酌立賞罰伏思國家設立營制自提鎮下層層節制尙難期人人驍勇而謂一鄉社長之賞罰卽可鼓舞人心恐無是理况鄉社長均是齊民賞之旣無費罰之又當何如其不可行四也原奏又稱煩擾宜除而僅指旱送名冊之駁回紙張飯食之需索官長看操之守

候以爲勞民病民不知人情每安常而憚改今將強使爲兵已不勝其勞且病矣况槍藥仍自官頒領校閱仍請官赴鄉而謂可絲毫無累人樂從恐不但不能行於江南并未能概行於各省其不可行五也原奏又稱練兵戶口宜寬免差徭查江蘇省民間祇納錢糧並無差徭惟西北各省賦稅較輕差務必資民力如因豫籌防禦遂與優免無論奉行難期公允且恐將來難復舊章於徵調轉運極有關係其不可行六也原奏稱漁船蛋戶熟諳水性擇其有技藝者練成一隊與鄉民互爲聲援查江海漁戶良莠不齊難保其不與賊匪勾結若令與鄉民互爲聲援良善者羞與爲伍強暴者因同惡相濟且以良民錢供去來無常之漁戶曠日持久萬難無繼其不可行七也有此七弊則議團練於無事之日正如該御史所奏害多利少不如不行也果使富民出資貧民

出力自相保護能使土匪斂跡逆氛漸退此皆民自爲於事急之時則民心不激而自奮若平時招集多人授以軍器教以戰陣良莠不分隱患甚鉅縱所招盡良民而破其顛蒙導以鬪很亦非道德齊禮之意疏入上嘉納之時議裁各省馬乾銀兩八月善寶偕壁昌疏言江蘇省額設陸路營馬僅供差操遇有緩急尙恐不敷驅策且夷人甫經就撫宜及時修我戎政若僅事補苴照部議裁減一半通省亦不過節省銀一萬四千餘兩所省者小所關甚大應請毋庸議減從之二十四年署兩江總督二十五年因饑疾奏請回籍調理允之二十九年捐助江蘇賑需咸豐二年捐助軍餉俱下部優敘三年卒子毓湘廣西潯州府知府孫柜江蘇候補道枏中書科中書樞直隸候補同知楣候選布政司理

問

國史
本傳

孫瑞珍字儲英道光三年進士改翰林院庶吉士六年散館授編修八年充湖北鄉試副考官九年丁母憂十一年服闋十三年以父年老告養回籍十五年丁父憂十七年服闋命在上書房行走十八年三月充會試同考官六月提督陝甘學政二十年回京命在上書房行走尋升國子監司業二十一年三月擢右春坊右庶子五月充日講起居注官七月升翰林院侍講學士二十二年遷太僕寺卿二十三年正月提督江西學政四月升內閣學士兼禮部侍郎銜二十四年升兵部右侍郎二十五年轉左侍郎仍留學政任二十六年任滿回京仍直上書房尋因御門誤班奪俸二年二十七年正月充經筵講官三月調戶部左侍郎兼管三庫事務四月充庶吉士散館閱卷大臣擢都察院左都御史十一月賜紫禁城騎馬二十八年三月兼署兵部尙書十月充武英殿

總裁二十九年閏四月充考試試差閱卷大臣七月擢禮部尙書八月充順天鄉試正考官尋署翰林院掌院學士管理戶部三庫事務三十年三月應文宗顯皇帝登極求賢詔奏保在籍前任雲貴總督林則徐請旨起用從之四月充殿試讀卷官五月調工部尙書六月調戶部尙書充翰林院學士九月宣宗成皇帝梓宮奉移墓陵禮成瑞珍以前任禮部尙書恭辦喪儀加二級十一月罷上書房行走尋因大理寺少卿田雨公奏參瑞珍辦事竭蹶物議紛滋傳旨詢問田雨公以得自傳聞覆奏諭曰孫瑞珍年近七旬精力尙健於戶部事務本非素習然數月以來朕觀其孜孜講求無時稍懈該少卿僅以傳聞嘲誚之詞回奏其傳聞數端又皆同堂公議並非瑞珍一人之私見朕親政伊始耳目未廣拾遺補闕朕所樂聞然黜陟大權朕自操之田雨公此奏殊屬冒昧

著傳旨申飭咸豐元年五月以擅進乾清門至南書房下部議處九月
奏言南河豐北漫口運道阻滯粵西軍務未竣需餉孔殷江蘇漕船自
道光十年後年年缺額偶行海運全漕俱到二十七年蘇松太二府一
州漕白糧米改由海運以津貼之費爲籌補之資多得米三十餘萬石
請將三屬新漕照案海運計多得之米糶出換銀可得三十餘萬兩且
帮船既不出運行糧耗米皆省可得銀八九十萬兩於庫儲不無小補
下部所司議行十月以捐備本籍賑需下部優敘十二月偕大學士祁篤
藻等奏言滇省鹽課改歸井竈兩淮改行票鹽俱年年溢銷其餘長蘆
河東兩廣閩浙四川各鹽務無不商疲引滯一由私鹽充斥一由浮費
增加爲今之計莫若改長商而行票鹽票商無費而鹽易銷減費卽所
以裕課其利一票商無費則鹽價賤賤則可以敵私敵私卽所以裕課

其利二票商挾本而來先課後鹽而課無短絀其利三票商量力納課
卽爲數無多亦准其販運則廣民間之生計其利四票商各自銷售恐
人之或有不食故鹽皆潔白則便各省之民食其利五票商價輕故民
願食官而私販因之以戢則化天下之莠民其利六得旨允行二年正
月京察屆期諭曰戶部尙書孫瑞珍辦理部務事實心盡力籌維任
勞任怨下部議叙尋命赴天津驗收海運米石先是瑞珍以庫欸支絀
奏陳各省綠營兵額原止五十餘萬乾隆四十六年增額六萬六千餘
名嘉慶道光年間兩次裁減尙存四萬八千餘名請全數刪汰以缺額
不補爲裁計每歲可節省餉銀一百二十餘萬兩至是於差次復申前
議略云裁兵一事有不可不裁者三不可緩裁者一一裁復舊額係因
時制宜計嘉慶道光年間其時府庫縱不充盈尙不至如今之甚而當

裁卽裁已隨時撙節今支絀更非昔比應請將未裁之數盡准裁汰以遵成憲而救時艱一裁復舊額於原存實數毫無所缺武營積習往往以空名冒領卽應將此項空糧裁起省無兵之餉而非去實有之兵防禦餉撥仍屬有餘一裁復舊額爲將來常行良法裁兵歲節帑金百二十萬此後庫儲無難變絀而爲盈卽有意外之需亦可有備無患一裁復舊額辦理不可不早除嚴汰空糧外出缺不補約須三年方能裁盡若遲辦一年多一年糜費卽少一年積儲當此萬分支絀豈可以有限之存蓄供無益之浮支疏入命通諭各省辦理五月回京七月充上書房總師傅御書湛虛蔚秀額賜之九月御門誤班下部議處尋以籌備楚粵軍餉偕定郡王載銓等酌議奏請中外文武見任原任大小官員均量力捐輸並推廣捐例共二十三條如所請行瑞珍尋捐銀六千兩

命交軍機處存記先是淮鹽銷路全賴兩湖嗣以軍興湖北川私侵灌
未見暢銷瑞珍奏請設卡緝私以收實效復因滇省產銅缺額減卯鑄
錢兵餉不敷支發請將每歲銅本銀一百萬兩撥解一半來京換錢搭
放兵餉可節省銀五十萬兩均從之時軍需孔亟命大學士軍機大臣
九卿會議籌餉三年二月左副都御史文瑞於會議時以見有暫救之
術商之瑞珍致議論牴牾奏參瑞珍自陳出語粗俗至出矢言上斥瑞
珍與文瑞均不知大體一併交部議處時御史王茂蔭奏陳鈔法十條
下部議奏瑞珍等以偽造難防民情不便逐層議駁略言原奏稱制鈔
以十兩爲一種五十兩爲一種等語查民間日用所需費錢數文或數
文或數十文不等今鈔不能分拆滯而不行價必遞減前明洪武年間
一貫之鈔折爲百六十文正統年間更折爲二三文此明證也其窒礙

難行者一原奏稱用尺五尺二之帛製成十兩五十兩之鈔又詳設圖記細編年月並特派一二人暗設標識等語防僞之心良苦然使僞造者比照真鈔依樣摹寫印記絲毫不殊而先以僞者交於官官取簿檢對一切皆符固以爲真而收之矣未幾而真者又至則今日真鈔斷難復却而前日僞鈔已受其欺况用僞之人不必卽造僞之人將執而刑之是有害於用鈔之良民也將矜而釋之是愈便於造僞之奸民也又况真僞之辨必須人人共曉方敢使用今惟一二人知之而用鈔之人散在各省勢不能紛紛來京持向此一二人辨別真僞其窒礙難行者二原奏稱錢號領餉准與微利庫平止繳市平並於次月繳納各州縣庫許爲辦解錢糧等語查市平較庫平每百兩短銀四兩設以原奏一千萬鈔之數計之已虧銀四十萬兩况商賈將本圖利得餉之後市物

換銀兩難交易專俟納糧屆期方爲其還原銀之日資本易盡不能奉法其窒礙難行者三原奏稱領鈔者如兵餉馬乾不便分拆卽向銀號換銀散給如勒措不換許民人指控等語是鈔不便於兵該御史已曾見及兵所不便者恐其梗而難行民所不便者欲其流而無滯勢必不能況以尋常換銀細故屢質於官訟獄之事旣繁需索之緣益啟其窒礙難行者四原奏稱凡天下州縣城內立一收鈔銀號以便遠近兌交又行鈔數年州縣有無鈔解充地丁近卽係辦理不善該督撫卽行參處等語因思銀錢使用城鄉市鎮隨處流行今鈔必城內兌換已多不便且一銀號資本幾何設遠近同時持鈔至者數逾鉅萬必閉肆而後已又鈔之不通不患地丁無鈔正患地丁有鈔設取巧之員按鈔不發一至納糧之日仍令照舊交銀而以所領之鈔作爲收自民間者繳納

藩庫又安貴此有名無實之舉耶其窒礙難行者五原奏稱如已銷之簿尙有未銷之鈔則取當年標識簿覈對眞僞立可辨認等語查解部舊鈔卽係捐項錢糧已收之欸如有僞鈔捐項不能勒令重捐錢糧不能責令賠償卽得造僞之人盡法懲治而虧缺之銀已歸無著其窒礙難行者六奏寢其議上是之旋命往天津會同直隸總督慶祺查收海運米石時粵匪由武昌竄擾江南三月瑞珍於差次奏言廣東順德縣屬陳村等處有紅單商船素歷大洋往來呂宋暹羅諸國其船合數十家共造舵工水手皆其父子兄弟衆心齊一其頭人係黃開廣梁定國二人前瓊州鎮總兵鮑起豹雇用是船勦平洋匪後收黃開廣入伍屢捕賊立功擢遊擊若使之雇募管領似屬相宜且船小便捷又得運掉嫻熟之人可期制勝上納之七月以粵匪竄撲河南歸德府逼近汴梁

奏請撤收黃河船隻以防賊匪北竄略云逆匪自粵竄楚得以直達江淮皆由岳州失守兩湖船隻被奪釀成大患查黃河形勢與江湖不同除渡船而外凡載貨之船無多但將沿河要口處處扼定所有南北岸船隻悉數撤收該逆無所得船非但南賊不能北渡卽竄擾懷慶者亦不獲南歸勦辦更易得力上躡之八月海運歲事上嘉其兩次辦理妥速賞戴花翎九月粵匪自直隸臨洛關北竄擾及天津等處京師戒嚴命偕奉命大將軍惠親王等辦理巡防事宜四年正月御書安土敦仁額賜之自三年十二月至是年二月瑞珍因病疊請開缺調理上溫諭慰留旋以病篤復懇開缺允之五年河北蕩平瑞珍以前經辦理巡防下部議敘八年卒遺疏入諭曰前任戶部尙書孫瑞珍持躬謹慎學問優長由翰林入直上書房蒙皇考宣宗成皇帝疊加簡任擢至正卿朕

御極之初調任戶部尙書籌畫度支克盡厥職任勞任怨不爲習氣所染前因患病准其開缺調理方冀長承恩澤永享遐齡茲聞溘逝悼惜殊深著賞給陀羅經被派繼善帶領侍衛十員卽日前往奠醊加恩贈太子太保銜照尙書例賜卹任內一切處分悉予開復應得卹典該衙門察例具奏伊子翰林院編修孫毓汶著賞給翰林院侍讀銜伊孫監生孫桐孫樟均著賞給舉人准其一體會試用示朕篤眷臣至意尋賜祭葬予諡文定子毓汶孫楫自有傳


國史本傳

馮德馨字桂山道光三年進士以主事分戶部遞遷郎中授貴州糧儲道調山西河東道擢廣西按察使兼署藩篆二十七年土寇雷在浩勾結廣西羣盜擾新甯德馨奉檄會楚兵堵勦以殲渠功賞孔雀翎擢江蘇布政使二十九年升湖南巡撫會新甯土匪李沅發倡亂戕官據城

德馨派軍勦辦以克復新寧逆就殄入告下部優敘尋知賊實棄城遠
颺疏劾所屬妄稟並自請嚴議上責德馨遷延貽誤奏報失實革職逮
問遣戍新疆咸豐三年奉旨回籍辦團防堵出力賞加四品頂戴後主
講任城書院士多成就同治七年卒

車克慎字意園道光十三年進士改庶吉士授編修十七年典河南鄉
試稱得人
大考升贊善督安徽學政嚴場規獎實學士風一變歷遷內
閣學士文宗顯皇帝御極應詔陳言上十願之疏極荷褒嘉升工部左
侍郎咸豐元年丁父憂回籍辦理濟寧賑務及團練捐輸五年回京署
兵部右侍郎授禮部右侍郎轉左侍郎以疾卒於位

孫毓漢字雲皋前大學士玉庭之第三孫幼失怙恃爲其世父善寶季
父瑞珍撫成之未冠補博士弟子旋以優等食餼與兄毓泗弟毓淮俱



有聲庠序道光二年舉於鄉其兄早世弟毓漑以甲辰科第一人魁多士毓漢屢上春官不得一第由是澹於榮利潛心根本性命之學不沾沾事帖括咸豐初江淮寇警輸資佐軍叙內閣中書倬值趨公必謹必慎未幾謝病歸閉門謝客不妄交接日手說文一編逐加點勘居平敬慎威儀嚴以律已罕見惰容與人交則盎盎春溫從無急言遽色治家嚴肅尤足爲法著有晚香草堂隨筆四卷古今尺攷一卷又刊傳驗方施良藥活人無算年七十六無疾而終

孫毓漑字梧江玉庭孫父仁榮候選通判早卒毓漑道光二十四年進士一甲第一人授修撰出督雲南學政會永昌回與漢闕滇西道梗總督林則徐督師勦辦毓漑謂之曰漢回無畦畛惟公斯服文武無芥蒂惟和乃濟林韙之亟行其策一舉而定咸豐元年命中外大臣各舉所

知大學士文慶首以毓漑名上召對稱旨出守江西吉安府未之任超擢山西按察使調浙江按察使二年鄞縣因徵糧聚衆辱官四境鼎沸奉化莠民又與石山鹽梟同時蠶起毓漑帶兵馳往相機勦撫殲渠散脅匝月而浙東平署布政使以助餉賞戴花翎積勞致疾乞歸杜門養疴值粵捻竄擾大學士賈楨疏舉毓漑辦本省團練力疾視事凡集貲募勇儲糧製械以及訓練校閱必躬必親州城賴以保全子棠以郎中供職工部毓漑就醫京邸卒於廡所

李福泰字星衢道光二十四年進士以知縣卽用分發廣東二十九年補潮陽縣知縣咸豐二年調番禺縣知縣四年升廣州府海防同知五年隨同鹽運使沈棣輝剿辦番禺縣屬沙灣菱塘二司地方股匪緣沙灣菱塘所屬一百二十一鄉四面環水自四年秋間逆首陳洸滌等聚

衆數萬分踞陳頭大石各水口及南安南固等礮臺勢甚猖獗福泰督率水勇馳剿探得大石賊瀕河築壘安設礮臺匪船百餘環衛之遂定計進攻分軍從後路抄襲逆衆列隊拒戰我軍以大礮殪其渠魁復轟沈匪船無數各路兵勇登岸火其巢賊大潰嗣是連戰獲勝遂進剿順德縣城踞賊生擒僞元帥僞部督二十餘名城遂復七年丁父憂八年署總督柏貴奏言軍務喫緊請將丁憂人員李福泰暫留粵省軍營差遣委用俟軍務完竣飭令回籍守制詔如所請九年總督黃宗漢奏言李福泰通達治理沈毅有爲堪膺艱鉅之任得旨著俟服闋後記名以知府用十一年以捐輸軍餉下部從優議叙旋署廣州府知府同治元年調補潮州府知府二年正月總督勞崇光以福泰官聲最優及籌辦捐餉事務出力奏請獎勵得旨以道員補用二月護理鹽運使三年正

月授鹽運使四月擢按察使四年正月以克復永安縣城敍功賞戴花翎二月遷布政使十二月閩浙總督左宗棠奏言李福泰於賊由連平上下坪竄嘉應州時虛報攻克追剿之功實屬粉飾疏入下部議處尋降三級調用五年二月諭曰前因左宗棠奏參廣東布政使李福泰粉飾戰功當照部議降調茲據瑞麟郭嵩燾奏稱該藩司服官粵省二十餘年循聲素著自同治三年委辦軍務尙能悉心調度見當大功告蒞懇恩開復處分等語李福泰粉飾之咎本所應得惟念其平日官聲尙好從戎數載不無微勞可錄著加恩准其開復降調處分來京另候簡用八月仍授廣東布政使十一月升福建巡撫六年九月創建閩省正誼書院八月偕將軍英桂等奏言查泉州府屬同安縣文屬泉州管轄武設同安一營隸漳州鎮專轄雖同安相距泉漳兩郡程途相等彼此

均堪控制無如該縣地瘠民貧風俗獷悍偶因細故微嫌動輒分類械鬪甚至遊民乘間糾衆攔途行劫故一遇此等案件卽應立時查拏在該縣卽可稟候泉州府覈辦而該營將備必須聽候漳州鎮調度雖陸路提督近駐泉州又以事有專屬不能不移商漳鎮是一縣文武分隸兩屬未免轉成隔閡請將同安一營改隸提標專轄控制較爲便捷且營縣統屬一府則節制旣專文武辦公亦不致稍有歧誤疏入報聞十一月調補廣東巡撫七年二月奏請補行守制得旨著俟陛見後賞假百日回籍補行穿孝十二月赴廣東巡撫任九年調署廣西巡撫十年四月卒遺疏入諭曰廣東巡撫署廣西巡撫李福泰由卽用知縣洊擢封圻厯任廣東福建等省辦事實心克勤厥職茲聞溘逝悼惜殊深李福泰著照巡撫例賜卹任內一切處分悉予開復應得卹典該衙門察

例具奏尋賜祭葬

國史本傳

孫如僅字亦何號松坪父式曾字少沂歲貢咸豐間粵匪竄擾同邑車克慎督辦團練約式曾相助凡勸募部勒訓練設防具有遠略事平力辭獎敘晚選甯陽訓導不赴遂於易凡陰陽消息動靜互根之理深抉精微里居授徒多有達者如僅咸豐三年進士一甲第一名授修撰歷督陝甘江蘇學政衡文校士拔取真才士論翕服在陝甘時值陝西逆匪猖獗如僅關懷大局每與兩省大吏密籌防禦之策按臨所至接見郡守邑宰諄諄以修城垣備軍械儲米粟爲戒著有曲徒粗議十六策大學士左宗棠剿匪時訪得其稿多所采用累擢至內閣學士卒於官孫毓汶字萊山咸豐六年一甲三名進士授編修丁憂歸治團練僧格林沁檄守河隄弗應坐法免官遣戍新疆同治改元錄輸餉功復故官

五年大考一等一名遷侍講學士先後典試四川提督福建學政轉侍
讀學士光緒元年母憂歸服除承故官尋遷詹事視學安徽七年擢工
部右侍郎十年命赴江南安徽河南湖北按事無少徇庇所奏中上意
還充軍機大臣兼入總理衙門賞黃馬褂十五年擢刑部尙書加太子
少保歷典會試順天鄉試十九年調兵部賜紫韁雙眼花翎踰歲中日
媾和李鴻章遣員齎約至毓汶慮毀約傷國體亟請署翁同龢李鴻藻
謂宜少緩鴻藻爭尤力同時臣工章奏凡百上皆斥和非計主事何藻
翔等且請戮毓汶等以謝國人上意頗猶豫欲廢約論戰鴻藻力贊之
毓汶抗言戰不可恃迺下其議王文韶劉坤一文韶疏入略如毓汶言
毓汶語同列曰我言何如鴻藻等相顧失色當是時俄法德滋不平亦
言臺灣不能割且旣予兵費遼東地不悉歸毋遽換約於是俾三國牒

日使未得報適天津霖雨軍械含漬軍士漂沒數千人文韶上其狀至謂不能軍毓汶遂據以入告復請署上意欲待各國之報毓汶曰事不宜待也恭親王奔訴嘿無語諸臣亦尠異同上不獲已流涕書之是日俄法二使又言姑少俟且任保護責毓汶等不納亦不上聞而和約迺成時議謂鴻章能成約毓汶頗有力焉明年稱疾乞休二十五年卒予

謚文恪

國史本傳

孫楫字駕航大學士玉庭之曾孫戶部尙書理珍之孫幼聰敏讀書卽得理解爲其祖素所鍾愛道光己酉庚戌兩遭國恤時瑞珍爲禮部尙書每於典章儀制輒命楫博考詳稽因備悉中朝掌故逢咸豐元年覃恩廕生以員外郎用分工部屯田司行走是年秋應順天鄉試中式舉人二年聯捷成進士改翰林院庶吉士三年癸丑散館以內閣中書用

到閣數月遽轉侍讀長漢票簽事書司票擬夜檢檔冊默識旁諮期無舛誤爲歷任內閣大學士所倚重五年乙卯科充四川鄉試副考官所取多知名士七年升禮部主客司郎中記名御史己未科充會試同考官補福建道監察御史稽察海運倉有各省奏留丁憂人員請量爲分別以示限制疏十年復充庚申科會試同考官轉掌陝西道御史巡視東城值津洋不靖奉命辦理五城團防時有以巡幸爲言者乃合滿漢科道聯銜諫阻未幾夷氛漸逼乘輿駐蹕木蘭京師戒嚴人心洶懼楫與各城不分畛域晝夜梭巡嚴禁訛傳以杜搖惑復責成副指揮添設偵探以察敵情協司城門啟閉民情又安十一年補工科給事中俄穆宗毅皇帝迴鑿先後與議宏德殿讀書及兩宮皇太后垂簾各條欵呈進明臣張居正帝鑑圖說奉旨留覽轉兵科給事中有請銷除載垣造

作諭旨疏同治元年巡視北城拏辦著名光棍挾仇毆傷承審官員奏奉諭旨交刑部嚴訊奏參條陳祀典語多謬妄之學政張錫嶸奉旨允行旋丁父憂三年服闋調戶科給事中請以西北城副指揮改爲繁缺俾資治理六年補授高廉道兼攝高州府事八年丁生母憂服闋仍補高廉道旋署廣東按察使飭紀整綱惟明克允次年受代督辦善後總局充文武鄉試監試官晉鹽運使銜兩署督糧道篆旋奉旨開缺送部引見逾年選廣東雷州府調補廣州府廣州地大物博最稱繁劇勤敏詳審處之裕如升廣西右江道年餘晉湖南按察使入都陛見遂補授順天府尹整躬率屬吏治日隆旋奉開缺之諭優游日下詩酒自娛未幾卒於京師寓次年七十有二

鍾麟同字建堂幼好學家貧落魄有大志其母以縫紉佐其讀書不稍

輟年未弱冠考入威海武備學堂期滿當課最時同學者爲王振畿范
鍾嶽皆相愛也二十六年鄂督張之洞檄赴鄂委筦武建二旂第一營
逾二年兼統右旂第一營鄂督端方委密查湖北全省軍務是年粵寇
起粵督岑春煊奏調赴粵剿匪寇平駐軍龍州旋奉檄赴越南文淵諒
山河內察核對訊事受知於督辦鄭孝胥委率軍官考察日本軍政以
粵西肅清保以知府補用復委遊歷越南三十二年岑督委統廣東新
軍第二標旣而以疾辭赴天津就醫直督袁世凱委帶陸軍第四鎮礮
隊三十四年直督楊士驤會同校閱大臣蔭昌保以道員補用并賞帶
花翎宣統元年滇督李經羲奏調差遣與王振畿范鍾嶽靳雲鵬孔慶
塘等先後至滇是時天下陸軍權最重而革命者時時以口說鼓動之
蔡鐸方爲三十七協統持革命尤力麟同與振畿皆知其蓄謀數爲滇

督言不聽辛亥八月湖北肇亂天下嚮應蔡鍔乃與其黨徒期會於九月初舉兵誅諸將之不附己者部署既定或由內斬關入先攻軍械局麟同見事急乃疾據五華山扼咽喉要地是時軍械局已爲革軍攻破相持一夜子彈已空麟同勢不支餘兵星散從者僅護弁數人沿街居民注視之麟同自陳到滇數年從未擾害百姓事至此天也乃大呼力竭以手槍自轟擊未絕義弁馮文繡張耀奎肩與舁之行至南門內七十四標及礮隊截留之斷其首懸於國門越日或合身首縫之以薄材葬於西門外又十餘日蔡鍔訊得之易棺停於老君廟事聞詔優卹予謚忠壯蔭其子培英爲主事麟同服官二十年家無儋石充兵官算學教習成就人材甚衆授命後王振畿范鍾嶽亦相繼以義死

惠普恩由行伍拔河標右營把總升江蘇海州千總訪獲教匪尹廷桂

等又奉檄赴曹縣之李家莊獲教匪李培珠以功升淮安城守營中軍
守備遷海州營都司道光二年邳州鹽梟趙永泰等滋事普恩率兵捕
剿斬永泰殲擒股匪五十餘人賞戴花翎歷任河標右營游擊蘇州城
守營參將江甯城守協副將十年經總督蔣攸銛保奏堪勝總兵之任
十二年擢徐州總兵十八年卒

唐傳猷字晉徽鄒縣籍居濟寧咸豐十一年貢生廷試列高等以七品
小京官用分吏部升主事光緒四年奏派充普陀谷萬年吉地監修是
冬以勞敝擢候補員外郎加四品銜家貧傭書傳猷工書法名震都下
有聞於醇王府邸者王加賞之命撰句書箋譯草帖篆鏡銘在邸中十
餘年來從未有所干請益爲王所重大學士寶鋆尤愛其書屢索分篆
亦未嘗有私謁以子承烈候補四川迎養至蜀承烈官陝西復從之長

安卒年七十有七著有松鶴堂詩集承烈字冕周由謄錄館議叙同知分省四川署馬邊廳同知後擢瀘州直隸州知州權雅州府皆有名績先是英人窺蜀富饒欲行輪利交通大學士李鴻章允之立約至十年屆期英商立德樂造固倫輪船擬上駛四川總督持其事函阻英使責負約聒於總署咨總督派員赴宜昌與議上駛章程總督劉秉璋知承烈有幹濟才乃檄往開議與英領事往復辨駁卒能就我範圍以雇民船暫行通商定議奏補甯遠府知府甯遠臨邊徼漢夷雜處刁悍號難治有何夷者尤狡悍爲患且數十年官吏莫敢誰何承烈抵任廉其實率練勇禽治之居民始得安枕議設土千戶八土百戶十四復仿治馬邊法禁質夷日五十餘名故終其任無夷患調署成都府知府僅十日因教案罷吏議落職大吏惜其去委辦三膽對章谷朱窩改土歸流

事官定稅率章程二十六條事聞趣入覲再起爲陝西候補知府逾年
丁父憂適兩宮西幸巡撫促令墨經從公設支應局自乘輿以至隨扈
諸王大臣供張悉辦迴鑾召見開封行在擢候補道留陝西補用署鳳
邠鹽法道陝安道按察使加布政使銜總辦陝省統捐事宜卒年五十

有七

以上錄山東通志

潘時見字用之前志箕孫時見四歲喪母事繼母以孝聞弱冠補博士
弟子員家素饒好任俠急人之急嘗習星占知天下當亂因徙家淮上
未幾流賊起再徙揚三徙京口四徙武林數徙而囊橐悉罄歸濟後數
椽僅避風雨田租不足供晨夕泊如也家僕姚某素受恩養曾殺人於
單爲竭力營救得脫旣僕背主爲盜怒叱之僕反噬誣訟幾蹈不測平
昔受惠者噤口裹足無一援手賴主讞者燭僕之奸寘於法事乃得解

人或爲不平時見仍一無芥蒂人服其寬大年五十七卒

林瑀字佩和以通經入泮與兄瑄弟瑗同受學使阮文達公之知中乾隆四十八年舉人再試禮闈不第遂絕意進取日誦周子遺書暨上蔡語錄或勸之著述瑀曰聖賢垂經訓以覺世如日月經天學者身體力行之不暇何庸妄贅一詞耶故遺文罕傳於世

林一鳳原名玠字品仲貢生前志候選州同知興淇子生平事親孝兄弟疾輒廢寢食爲營醫藥治家教子嚴整有法鄉人有犯親顏者旣而悔曰吾知罪矣毋令林公知今而後當以林公事親者事我親以林公友昆季者愛我昆季庶不終見絕於林公乎其實行感人類如此平生服膺經訓嘗語門弟子曰先聖立言垂教原欲納民軌物之中非供學人資取科名也嘉慶四年卒里人請祀孝弟祠私謚曰孝友先生

李德立字升齋父光時乾隆四十二年解元四十五年進士官浙江嶧縣知縣不名一錢家無擔石儲德立與伯兄業立食貧讀書業立嘉慶六年舉人德立嘉慶十四年進士授編修兩典鄉試得士爲盛官監察御史正直敢言以陳弊政挽頽俗爲己任出守江蘇常州府中蜚語幾罣吏議卒得白復任後洊升直隸大順廣道署直隸按察使罷官歸里教授多所成就年七十卒子建書貢生署泗水縣教諭銘書附生

李鍾淳字毓樸前志庠生昌祖孫生而魁梧剛明強毅弱冠補諸生援例捐主事分戶部改官直隸授安州知州蝗孽水災發倉賑貸不俟稟請而行直督李敏達公衛奇之調廣平府同知擢守承德乾隆壬戌駕巡畿輔蒙召見垂詢民風及侍從有無騷擾奏對稱旨記名能員第一旋調天津府知府署理天津兵備道理繁治劇處以鎮靜民感之樹德

政碑以父病告歸家素封州境饑出資巨萬助賑重新所居宅不計糜

費隱廡以工代賑意里人受其施者名所居室爲天津府云弟鍾漫歲

貢生子大峒嘉慶戊午舉人鍾泌官戶部湖廣司員外郎鍾沛候選同

知與從兄鍾沂立家塾集族人無力就學者厚其廩餼子大岑大峻俱

捐職郎中孫珣嘉慶癸酉舉人四川內江縣知縣珙道光癸未進士四

川郫縣知縣琮江蘇常熟縣知縣璿增廣生以繪事著名大江南北無

不知李白樓者卽璿字也

據張淑渠撰墓誌及家傳

李鍾淑字平侯附貢生山西平陸縣知縣擢霍州直隸州知州卒於任

初尹平陸省徭裁役休養生息邑人號爲慈母平陸舊有傅巖書屋諸

生以時肄業其中惟無童子數學地鍾淑與邑紳拓地建學舍復捐廉

購地歲收租息爲延師修脯費爲文記之審理獄訟發摘如神猶以不

得民情爲慮歷大同代州霍州以清廉甲山西云

據李元坦所撰墓誌銘及自撰傅巖書院記

李聯壇字佑庭號杏墀監察御史瑩子年十七入州庠嘉慶九年舉人父卒京邸適聯壇在籍以未親殮爲終身疚遂絕意進取積書三萬卷日誦近思錄伊雜淵源錄嘗謂北溪字義爲立身門徑慈溪日抄爲學古門徑黃勉齋金仁山吳草廬薛敬軒爲儒宗正脈許魯齋倡道河朔洵豪傑之士明儒譏其不當仕元不知魯齋生於北方非背宋入元者比也又於學期有用不恃空言王陽明良知之說本於孟子羅呂諸公與之水火是爲賢者之過愛幼弟聯靖尤篤親授之讀手泐丹黃午夜不倦漕督周文忠公天爵與侍御友善每巡漕駐節於濟輒過門通問聯壇但以名刺答恐人知與有舊介請託也文忠性方嚴用此尤欽許之嘗語人曰吾於濟寧得一澹臺滅明年家子李佑庭也著有杏墀遺

稿季子承楷字卓軒研究理學以餘力博涉典籍尤嗜離騷陶杜詩誦不去口謂陶之寄意不在紀年宋主劉裕以毒酒弑零陵王故飲酒諸作雜亂其詞止酒一篇尤慨乎言之咸豐十年捻逆北擾濟寧戒嚴隨其叔聯靖捐資數萬募勇防守九月間賊大至自募一隊率之助官紳城守既嚴卽罷遣所募奉身退母黃患病瀕危承楷日夜叩天求以身代翌日遂得良醫師景直者診之愈未逾年竟以疾先母卒

據孫瑞珍所撰墓誌及鍾

寶立東山居士傳

李聯靖字相庭附貢生員外郎銜前監察御史瑩季子九歲孤事節母以孝事長兄如父兄教之嚴星象地志史傳語錄與舉業並授不成誦不敢退也長從許鴻磐肄業許官泗州知州解組後日事丹鉛聯靖兄聯壇助之成方輿考證百二十卷以無子授聯靖藏於家咸豐初粵寇

北犯聯堵竭資倡捐修城築圩募勇詰姦咸從其役局費支絀有欲按畝徵稅者聯堵力言不可且曰小民尺地寸土正供外又添此追呼萬一曠日持久其何以堪明季加餉不曰再累吾民一年乎流賊乘此藉口從逆者日衆前車之鑒也衆爲之動容事乃寢逃匪徧野獲之輒得重賞聯堵請再三研鞫除甘心爲賊奸細者戮之脅從罔治全活甚衆先是道光庚子徐清惠公宗幹牧濟創修州志聯堵長兄與其事成書未刊咸豐戊午州牧盧朝安復申前志使之卒兄業更成績志四卷聯堵文雄深奧有古懽書屋詩文若干卷

據張榮祝所撰墓誌

劉椿字松僚號海盦前志邱縣教諭廷掄曾孫嘉慶二十一年舉人官濟陽縣教諭椿嘗謂四書五經功令用宋人注蓋不強人以所難非他注不必讀也乾隆初頒十三經注疏於學宮三禮義疏純用鄭氏說是

其明證今習經者羣書既束之高閣朱注亦未全理會道聽塗說又譏他人用古注者爲別解不可訓是陋儒也卒於官

袁鴻字達賓嘉慶十三年舉人通西算嘗謂數居六藝之末而爲用甚大大挑知縣改教職選海豐縣訓導訓迪諸生以學行相勗勵自題其署云菜羹豆粥安吾分茅舍柴門稱此官又云有才未必眞佳士無品不能作冷官任滿洒然告歸布衣蔬食依然寒素著有儀禮摘要左傳分國類編晚尤致力於算術有手抄定本同里進士王允善以厯學來問病中猶函復千餘言並將手抄本及諸書贈之年八十二卒子兆昶孫景珂曾孫文翰均諸生

王允善字膺之號雨樓前志翰林院侍講仲愚曾孫允善幼篤學年十六補博士弟子員旋試優等食廩餼調入灤源書院肄業咸豐八年舉

於鄉以在籍辦團練獎內閣中書同治二年成進士仍以中書用歷官國史館校對官本衙門撰文委署侍讀兼辦誥敕房事務補宗人府漢堂主事玉牒館纂修官玉牒告成以員外郎分部并蒙賞緞疋銀兩旋分戶部補山西員外郎福建司郎中俸滿以繁缺知府記名召見時溫諭再三奏對稱旨允善素好博覽殫心經史史記世家漢書列傳胥有手錄專本而於明史爲尤熟嗣見十六國春秋繁而無統因仿史記表例作十六國年表一卷又以漢以後年號難撮記因舉自漢至明正統偏安按年編次作年號歌一卷讀史之餘兼及輿地平時手畫之圖說盈尺許中原與海外諸國皆能得其形勢嘗謂魏源海國圖志爲先得我心蓋讀史不明輿地如盲人行路雖所熟經終不明其方向也又嘗研究天文算學袁達賓先生授以梅戴諸書遂得其梗概嗣復得欽定

數理精蘊遂專心致力於此矣其於本朝掌故尤所究心生平最好碑版石刻若王大令之聖教序率更令之皇甫碑臨摹不下數百遍黃庭經臨至三千遍其餘若蘇若董亦嘗口說指畫娓娓不倦少工吟詠晚年之詩全本乎杜仇注杜詩全集可背誦者十之七尤嗜老杜五律皆手錄一過本朝詩喜讀王朱少年所作頗似之惟不及漁洋聲調譜以其拘成格也咸豐之季捻匪竄濟上允善與二三同志率鄉團義勇出守濟安臺與賊相拒僅八九里賊偵知有備遁去明年遂有議修土圩之舉厥工既葺賊又麇至本城官兵出戰於十里鋪全軍覆沒允善督率勇丁嚴守要害并渡河迎擊槍斃悍匪奪取馬匹槍杆賊見勢不敵悉散去其厯官半居清要編纂尤多在戶部時綜司會計句稽冊簿至丙夜不休有不符者俱簽出光緒九年法人肇釁海道梗塞京中紛紛

議歸河運允善確見河運之萬不能復徒費帑項無補實際因具說帖洋洋數千言悉中肯綮時論韙之年六十有三卒於官子延錡優廩生延釗附生歷官鴻臚寺漢鳴贊度支部主事孫謝家舉人考職以主事用燕晉附生

史成元字殿甲嘉慶丙子科舉人咸豐間南匪北竄成元與南鄉紳耆修築牛頭河復築外圩以爲濟寧保障

李廷儀字鳳階號棣生未冠游庠卽絕意仕進宅傍闢隙地讀書其中顏曰些園寓知足自適之意晚自號惜花老人日錄所閱書蠅頭字三百百無一畫苟簡年九十三卒著有惜花老人詩草

據張恩榮傳略

李珙字恭甫父大峻兵部郎中珙道光元年舉人三年成進士以知縣歸班選用十七年選四川郫縣知縣值歲饑發倉賑濟全活無算邑猾

恃紳富凌轢鄉里立拘到案褫革定罪民情大慰縣試唱名至李生文濬見其衣敝緼心憫之及閱文知爲佳士亟首拔之其誅鋤豪強扶掖寒峻邑人稱頌不衰焉

李琮字調初道光十六年選授江蘇吳縣主簿十八年升金壇縣丞緝獲海盜陸茂松等十三名復破二十餘案旋代理崑山縣事值英人擾鎮江調府襄辦丹陽行營糧臺二十三年調江甯縣丞督濬徒陽運河旋代理嘉定縣事二十四年代理沛縣事以卓異升補常熟縣知縣下車清釐積案定緝捕章程條守望規畫水巡有船火器有備未及一年粲然具舉邑有雁鵝黨爲閭里害懲其魁俗乃革二十八年邑北境海溢漂沒無算勸捐賑濟民無流亡時淮陽流民過境亦資遣無失所逾年邑東南水災琮已病鄉民羣訴堂下琮扶病出慰之力疾邀紳士議

灑澹竟以積勞卒

張廷勳字輔宸其先有名起豹者當明季土寇四起糾鄉人禦賊殉難廷勳之高祖也廷勳性儉約而善施予親族負欠不能償輒焚其券姊適徐氏者早寡代撫其孤與人無爭競鄉里有鬪者遇廷勳輒慚沮退家富藏書日擁圖籍探討儒先身心體驗之學謂忍字消爭競貪鄙忌刻諸念作誨忍圖示子孫復闡明退字義博引經史銘座右嘗集家人曉以古今節義及鄉前輩嘉言懿行以爲訓門庭肅穆州人推重焉年九十卒次子榮泰字履堂道光八年舉人學殖淹博於書無所不讀尤工駢儷文咸豐二年河決豐口災及濟境又值粵匪北竄榮泰勸辦團練安集流氓措置咸當人服其有應務才後得失音疾時懼貽父母戚沒之前日猶力疾候寢門承色笑依戀如平時卒年五十五著有葩經

批屈辭解正續賦論季子榮祝字介堂咸豐二年進士工部主事以父母俱年逾八旬欲乞終養值粵匪北犯恐涉規避乃循例捐郎中以歸髮捻先後肆擾里中士紳爭起言兵榮祝曰父母之年喜懼相乘何暇他務事亟奉父母避亂村居常徒步隨行顛沛中亂後家益落遂杜門不出運河道王化堂以同年高其行誼聘主講任城書院同治十三年卒長子榮春四品銜三子榮光附生孫仕書位書俱附生

潘遵鼎字鐵菴前志應賓裔孫博學多識鄉試屢荐不售益肆力古文辭詩宗漁洋多清微談遠之音遨遊南北留心經世之學凡古今制度損益輿地沿革靡不講貫條晰一時名公卿多折節交之刑部尙書趙文恪公光東撫丁文誠公葆楨尤禮重焉先是粵捻擾州人車克慎孫毓漑奉旨團練以書招之歸遵鼎請聯合曹沂紳民收其豪傑爲我

外援既固我圉且免資盜阻之者笑其迂議遂罷後捻逆北來二屬俱殘破土匪迄數年不靖人始服其先見性友愛弟遵彭少二歲年七十猶同居迎寡姊於家事奉者三十年有珍異必先姊而後已尤篤友誼天津李毅齋客死濟上資之殯塋歲時拜掃必繞道詣其墓醮而後去少精醫理若天授嘗曰醫道聖人所慎流爲技術失周禮十全遺意史記列傳詳列脈案非深於此道者不能知以李時珍本草綱目博而寡要愛徐大椿神農本草百種錄欲以所知者續之又謂藥重所出南北異宜燥溼異性思合古今土產爲本草地埋今釋一書未成而卒著有勿自欺齋詩文鈔運氣述傷寒溫習錄子矩健附監生

潘遵訓字魯齋歲貢里居講授及門恒數十人教後進必以先正爲程嘗曰制義代聖賢立言文而不能覺世者皆游詞也門下賴以成名者

泗水縣志卷之二 名一 一 一
甚衆如劉光祿文驤田廣文汝畚李侍御瑩及從弟遵鼎皆是也性孝友視人急如已急門人陳茂才蘭坡家綦貧親老不能供甘旨遵訓慨然謂及門陳生有老親在吾輩宜周之衆欣然以助陳介士力辭不敢受時遵鼎亦在坐曰師命也且爲二老壽若安得辭陳白於父始一一羅拜饋者聞者兩賢之

郭貞復字誠之於書畫金石鑑別最精道光二年副貢生充武英殿校錄選授費縣教諭十二年舉鄉試第二名升青州教授課士最嚴及門受業者日衆有貧不自給者竭資助之俸滿以知縣在任候選未幾卒子鳴鶴孫廉能俱諸生

王春藻字曉村歲貢生性至孝家貧甫弱冠丁父艱以授讀養母師事華亭袁希肅山長歲科試輒優等鄉試屢薦未售生徒得其緒餘冠絕

流輩如段樹榛劉保厚郭樹榕孟廣來其尤著也皖匪北擾袁山長建
守城不如守郭之論欲於城四周數十里外建土圩以資捍禦春藻力
贊之約州人教職李政舉人孫爲埶等合謀任力不數月工竣又以鄉
民流離失所復申堅壁清野之法俾完繕保故辛壬癸甲間捻逆迭次
窺擾城鄉卒賴以免所著若忠親王勦寇紀略程使君誅叛事略書完
縣賑務保甲議皆有裨實用春藻嘗致書游匯東侍郎議貢生選教法
致書魏實堂論錄取遺才事尤爲時論所稱年六十丁母憂哀哀爲孺
子泣聞者莫能仰視卒年七十四著有論經析字安固堂古文子儀祖
附生榮祖廩貢生孫伯廣附生

張繼魯字少宇號周輔前志有年次孫道光九年進士以知縣分發甘
肅署燉煌知縣日坐堂皇理曲直不事敲撲幾致刑措調署撫彝通判

改補隆德知縣未二年以臂疾將告歸未離任卒隆德民皆爲位哭之
子鴻儀閒關扶柩歸亦卒繼魯性慈善遇急難竭力相助鄉人以善人
稱之好汲引後進誘掖激勵成就者多如于如川解元張石田汝畚孝
廉副貢王元廩生李鴻良等皆受其裁成于以貧故幾不能終業繼魯
惜其才勸之學妻以兄之子嘗曰于如川非終貧賤者後果如所言弟
繼鄒字小和道光乙酉拔貢十八年進士與兄繼魯齊名嘗謂讀書爲
人不可判爲兩事讀書能博文強識必先辨明是非爲人必先打破義
利關方有著處尤注重反身之誠平生得力處皆在此以知縣分廣東
任東莞知縣以廉明著己亥甲辰兩充鄉試同考官所得多知名士旋
署儋州補南海令南海粵東首邑事繁劇繼鄒風裁益峻罷民所不便
者政令一新市僧以苞苴進求如所願力持不允失大府意幾被劾士

民知其實懇之上乃免終以不得行其志具牘乞退時州人李福泰亦官廣東延教其子弟又四年旋里卒繼鄒在粵時兄繼虞弟繼騫及妹甥等皆在署中先後歿妻楊宜人亦卒積數椽貧不能歸同治年間嗣子惟寅赴廣東會城粵人感舊恩釀資助之始得歸葬

吳謐字寧遠少入邑庠秋闈屢荐不售澹如也喜作詩尤善爲詩餘素安義命嘗語人曰學者欲爲君子必自知命始知命斯尤怨不生德名可立亦不至枉其才智因自號於人曰鈍也學者號爲鈍菴先生云

潘原璧字東軒少穎異於書無所不讀未冠補諸生旣而鄙夷帖括之學務爲通經致用尤嗜易視世俗名位無足動其意者性至孝以母病自習歧黃昕夕探討幽宣邃通爲母醫輒奏效家儲藥物遇人有病爲之診治無倦容道光季年歲大稔族人無所得食者至集於庭悉善待

之村西有荒地三十畝每於農事暇時招集鄰里窮乏者闢爲園日給以食老者弱者咸與焉蓋隱寓周卹之意而人不知也年七十五歲卒劉清字季廉一字芝生明薊州都司洪基裔孫少持行以義不苟爲異同子世恩以兵部司務籤發直隸同知迎養來直清以省垣酬應劇移居涿郡閉戶絕居數年涿人士咸敬愛之光緒三年世恩緣事去官投効新疆戀父不肯去清訓之曰丈夫報國死耳吾年雖邁體尙健行矣勿爲兒女子態世恩以參佐戎幕功復官其弟世鵬卒於關外世恩以其喪歸旣而法人越戰起世恩復赴廣西軍營歿於軍巡撫李公秉衡上其事追贈道銜入祀昭忠祠清旣老携家旋里李公屢書詢其近况清遂答之而無所干謁焉居平習壬遁術讀史得其大意詩氣格近劍

南著有文集

鍾寶立字砥柱由歲貢中同治九年舉人弟寶任甲子科舉人寶和優廩生寶和先卒哭之慟偕寶任事母幾六十年家雖貧甘旨無少缺母卒後得末疾棲遲牀褥兄弟相依爲命又數年寶任病歿時寶立疾已深微聞之遂不語未逾歲亦卒年七十有九寶立善屬文從學者衆口講指授無虛日爲文章嶽崎磊落不可控制詩近明七子出入漢魏誘掖後進多所成就也

孫浩字養齋道光元年舉人生有異稟年十三讀十三經徧肆力於根柢之學不屑屑於帖括咸豐三年截取知縣以體衰就國子監學錄歸適邑有寇患練團勇浩急於公務昕夕不懈州牧盧朝安延辦外城土濠圩成濠深濬禦寇得力議獎敍浩固辭乃以其子爲埠防勦勞績上叙內閣中書年七十一卒入祀報功祠

李功溥字博泉少喪母毀瘠滅性長爲族曾祖父載庭司出納數百萬金無絲毫苟且載庭無嗣卒後爭繼者紛起功溥調護之不致釀成巨案以在籍團練功得同知銜父傳業爲李氏宗子傳業卒時遺訓謂宗祠祭祀不可忽功溥鳩族人用春秋二丁祭享終其身弗輟族人感之益敦睦焉

趙以廉字礪堂性沈毅工書法弟蚤逝撫其女如己出宗族困乏無少吝精堪輿不尙形家附會之說咸豐初年隨州人團練義勇知州盧曉亭重之委辦各村鄉團分路勸諭期月而集其他葺橋治道釀資庀材奔走闐闐閒任勞任怨視爲己事經費不敷者解囊助之不言功也庚申金鄉有王李二姓潛謀不軌邑告密以廉白於知州誘至州置之法金鄉人德之卒年六十孫嘉蘭廩膳生年未三旬而卒士林惜之曾孫

爲楫附生

郭貞乾字健堂號柳渠前志舉人忱子方十齡通四子書講義孜孜學問弱冠入庠歲科試屢列優等食餼父司鐸壽光致士歸田患日疾失明貞乾服勞奉養曲順親心遭父母喪哀毀骨立鄉里以孝稱好施子急人之急不留宿諾教授生徒以育才爲己任道光二十年與子汝誠同舉於鄉明年汝誠成進士咸豐八九年間捻匪屢擾濟境紳董議築圩浚濠以保衛城關解囊助之所居在東關觀音閣實州境要區招募義勇置器械立柵欄經費皆獨任之事竣力辭保獎僧忠親王駐軍濟寧患餉絀勸捐貞乾立輸三百金其見義勇爲類如此著有露拙軒文稿行世子汝誠字立菴號葵圃生而穎異未弱冠補博士弟子員道光二十年舉於鄉明年成進士以知縣分廣東初授封川卽得士民再調

澄海潮陽東莞新寧順德諸縣所至有政聲其治澄海也甫下車卽嚴令捕盜獲魁數人寘之法羣盜懾伏不敢動邑舊有景韓書院久廢圯復新之又爲之建各鄉義學去任後澄人猶尸祝之東莞俗稱獷悍以械鬪爲常大竹諸蠻尤桀黠汝誠蒞任後一再創之而陋俗漸革其修寶安書院立四隅義學一如治澄時及調任新寧莞人乞留不獲乃繪像奉書院及義學中以誌去思焉大府廉知公才陞署羅定州旋守肇慶府兼理肇羅道肇慶地當險要且是時首亂何亞六擁衆十餘萬遣李文茂伍伯吉等攻會城逼羅定羅定以汝誠扼守得全而肇慶陷前守已殉難汝誠奉命復肇慶卽馳往賊以汝誠文吏大設戰艦懼之汝誠不爲動爰密約參將某問道取東安絕賊糧道再襲新橋白珠等揭其穴賊巢盡覆賊大恐將竭力以攻之汝誠僞退潛出南江口會粵西

張廉訪合兵復德慶州賊勢益孤汝誠乃進駐北根里先伏兵江岸不
動而自督祿步悅城諸路練勇由水路進時賊已饑羸望而奪氣我軍
奮擊賊舶都沈焚溺無算有逸出者伏兵突出悉禽之遂復肇慶先是
汝誠在羅定時恒徹夜不寐卽得咯血疾及復肇慶後猶力疾視事以
積勞卒於任孫樹榕字肇生號壽農幼警敏讀書有夙慧同治三年舉
於鄉以倡辦鄉團保教職復從戎於滇保知縣分廣東樹榕少長嶺南
其人情風土素悉到省卽有幹練稱曾忠襄公國荃最器之歷官乳源
石城南海知縣爲政精密嚴恕法成令修而又善決疑獄一時有神明
鑒其任石城時有掘頭六者聚衆肇亂督撫檄樹榕以兵圍而殲之榕
擒首要寬脅從其保全尤多大吏咸以爲稱職因是才名傾其流輩爲
纔忌所中竟挂彈章後剖雪復職補新寧署新會剔訟蠹革大票井閭

無擾又以伉直忤大吏罷官歸時新政繁興州牧推榕總辦勸學所巡警局會楊文敬公士驤來撫山東素有舊延至省垣籌辦學務並纂修山東通志文敬督畿輔約偕往辭不赴卒年六十七樹榕善書法每自珍惜不輕作得者益什襲寶之

魏成基字福坪光緒二年舉人爲嶧陽書院山長功先誠敬文務雅馴地方有大利害必爲官紳開陳摩畫未嘗一語及私在嶧陽十餘年以道遠辭就近主泗源講席數歲雷澤書院多士傾風再三敦請始改轍往旋授鄒縣教諭未之任遘疾卒子庚溪諸生

李成龍字雲浦咸豐五年舉人大挑選鉅野縣訓導廉俸入悉以賙戚族故時之貧寒者歷任十年毫無積蓄常語其子曰我死後門生輩必有以厚葬議者萬不可受汝量力爲之我甘心焉年八十卒

李政字懋堂恩年子附貢生見義敢爲咸豐辛酉髮匪躡山東近薄濟寧城下政率鄉丁守城圩凡邑有大徭役及公益事成推之補霑化學博三年恩弟歸不復出弟紀字敍堂廩貢生性孝友與兄政家居極倡和友于之樂邑知名士如許鴻磐鄭勉多與之游詩酒往來無虛日晚年好靜築居易樓誦讀其中喜施予樂善不倦與兄政同居八十年一門之內怡怡如也邑人作九老會政與紀胥在其列云

孫毓華字西屏一字蓮峯附生成豐九年賊匪初熾毓華任團務捻逆遽偪運河以西毓華集衆守河夜半傳催至黎明僅得數百人時賊勢盛人馬以萬計計衆寡不敵乃誠衆執火器勿譁隔岸候之待其偪岸乃擊之賊稍卻又待之再來再擊如是者三賊知不可渡乃奔西南毓華計其必白石佛聞渡復率衆沿隄白石佛聞登高以望賊首已率百

餘騎至閘下過矣毓華登高大呼擊賊我衆火器齊發賊首人馬俱碎
賊衆驚退既僧邸駐濟寧相地勢以石佛閘一帶爲濟州以東門戶諭
築長圍毓華督理之圍成僧邸又以河水淺賊易渡毓華以大板二十
置閘中由是水益深賊蹤數往來終不能渡復以不時至力勸鄉民遍
築土圍新成圍而無資糧者自出薪米給之以故人樂爲守先是柳溝
河決二百餘丈深與河等二十餘年村莊歲被災毓華倡義捐貲晝夜
督理工竣濟人感之年五十二卒濟滋鄒邑紳耆合詞請入報功祠崇
祀焉著有易經纂註詩經纂註書經纂註而於易尤精次子楷字聖植
國學生能繼父志光緒二年及十五年歲饑道殣相望楷出粟萬五千
斛賑濟之全活無算先是咸豐十年捻逆窺運河欲東竄楷佐父堵截
右股受賊火器傷無退志拒益力數十村賴以奠定所居村外爲泗水

故道伏水漲發土圩幾潰楷解衣入水率衆扞蔽流爲旁行圩外石梁屢圯於水楷常獨力倡修之卒之後鄉人私謚爲廉惠先生并奉主入報功祠祀之孫肇煊肇煜均諸生肇炆翰林院待詔

許高彭字商賢號芝山道光二十四年舉人事親以孝聞咸豐三年捻匪北竄知州陳應元諭民間募勇辦團以爲犄角高彭任城東鄉總團長與庠生高從儉臧汝溪高從恭吳愉先等南貫集創立土圩周十餘里先是愉先從儉於道光間以泗河頻決黃水爲災與李得昌高彭請賑出力民咸德之是時南貫集築圩因要與從事圩成守具畢備四近辟難者咸歸焉城東倚爲保障八年選濰縣教諭蒞任後佐縣令守城有功保以知縣用未幾遘疾卒子涖陽候選知縣先年餘歿

高從恭字夷門附貢生許高彭之弟子咸豐年捻匪北竄白蓮匪又不

時攘脫時高彭任濰縣教諭衆倉皇莫知所措從恭揚言曰亂寇頻仍不思禦敵徒楚囚對泣何益衆服其卓見因推爲團長從恭一依其師成法修戰守之具勤加訓練部伍整齊時避亂入寨者數千家悉爲安置知州程繩武知恭能諭守趙村運隄賊不敢飛越後諭爲東鄉總團長事平以功獎敘候補訓導時泗河隄決數百丈綿延十八年被災多至七十餘村從恭乃偕孫毓華籌款以工代賑民用樂趨越三月工竣同治十年知州王錫麟委辦黃河侯家林工數月歲事光緒元年復委督率東鄉民夫堵塞黑紅廟黃河決口亦數月告成時東撫丁寶楨嘉其勤奏請以教諭用并議敘五品銜以褒之

常學文字警餘咸豐癸丑捻匪北竄知州陳應元諭令辦團推學文爲團長乃偕常所履常宗禹常宗皋等剏立土圩周數里悉心守禦得以

保全光緒元年復佐高從恭堵塞紅黃廟黃河決口工竣叙議五品銜
王伯槐字寄園附貢生成豐間髮匪亂襄辦圩工保教諭時陳國瑞軍
駐濟寧伯槐以愛民請國瑞聽其言遂訂交由是勦辦多從其贊畫著
有鶴背吟草草草草堂存草其上曾文正挽復南河故道尤於時政有
關焉

冷元輝字明軒捻匪逼近濟境元輝首倡捐輸舉辦團練守護土圩日
夜不少息時僧親王善將軍唐提督均駐防本境糧芻供給日捐數百
緡如是月餘無吝色事畢由軍功保授鹽提舉元輝親老不樂仕進以
事親爲樂不復出

李汝沆字芷泉附貢生父廷榮素長厚每爲人代償欠負致家中落粵
匪之亂猶倡辦團練汝沆補諸生從父襄辦團練歷七八年不稍懈佐

修城工亦深資臂助

解克順字備堂附貢捻匪北竄襄辦義團同治間監修文廟以辦團功保訓導子瑞躬字執臣廩生善畫工詩尤好金石著有井觀吟稿孫同舒廩貢同煜庠生

王雲龍字竹村武生善書文廟泮池中聖泉二字雲龍所書也以保衛地方功從祀昭忠祠子大勤號慶笙武生善繪圖咸豐間捻匪北侵築修外郭土圩工竣又總帶仁義二團防守北郭時捻匪任柱圍甚急又陰雨無可守乃遣團勇以蒲包蒙首手執大香不少怠賊知有備撤圍去後以修城禦賊功以河標左營把總調城守營左哨把總孫健之號幼笙光緒二年武科解元河標中營千總賞戴花翎免補守備以都司用後以游擊升用次孫福之字介生中營千總免補守備以都司用賞

戴花翎

趙芳馨字桂山附生工書尤以隸篆名精金石學手集漢碑四十餘種著有琴鶴山房印譜咸同間襄辦義勇局事未嘗稍辭勞獎叙以教授諭用子汝虔廩膳生亦工書

徐清祥字瑞符附生敦品勵行守正不阿性嗜學老而彌篤綜諸家經說參以己意彙集經解若干卷用資考證同治初捻匪竄濟境東關分設勇局襄辦團練子桂馨增生桂森歲貢孫煥文諸生

王慶瀾字觀卿附貢生候選縣丞性慷慨豪爽於義舉毅然無推諉拂意事每好爲不平之鳴而嫉惡最嚴同治年襄辦團練尤不避勞怨焉子元瑞元璋均拔貢元璐進士

秦恩光字錫三附生捻匪北竄族婦死義者九人恩光悉輿尸歸塋之

以率衆築運堤禦賊有功例當得獎叙恩光婉謝卒以諸生老子在豐
字少穆附生鴻臚寺序班尙氣節光緒乙未典商增息慷慨爭之卒廢
衆志時人以爲難

王恩綬字中舫乾錫仲子援例以縣丞候選補江西瀘溪縣典史勤恤
獄囚待人以恕而馭役嚴閭閻無攘竊之患解組日篋僅布衣數襲瀘
民之送者途爲之塞云

冷元燮字理臣由軍功保舉授直隸無極縣知縣理冤疏僉稱平允邑
大饑元燮請急賑并捐廉平糴饑民賴以全活鄰境亦霑其惠旋調補
晉州知州未之任丁外艱歸遂卒

許恒業字性齋一號梅溪附貢生洪陽亂作知州盧朝安委辦城西團
練恒業與仲兄勤業分詣各村簡精壯教兵法鄉人恃爲長城及忠親

王僧格林沁馳檄南征過長溝閱諸團以爲能擢佐行營事務恒業每爲之剔夙弊申法令嘗語人曰兵勝而無所懾則驕驕則不祥閱者嘆爲名言當忠親王駐軍汴省適營中糧缺聞某寨儲甚夥委提十萬斛恒業曉以大義寨民皆傾倉指困以運輸部署船隻順流而下帆檣林立軍氣爲之一振忠親王握手勞之累保至直隸州銜儘先選用府通判洎忠親王遇害子襲封爵就邸第復來書招之以親老固辭恒業工書畫晚年尤精金石之學與中表李政李紀昆弟及諸耆宿結九老會終日談讌以自娛焉子鍾琦恩貢生鍾琳附貢生

劉朝太字相臣咸豐初隨漕帥福濟赴江北防勦積功至都司賞花翎補陝西邠州都司以膺勇聞抵任未逾年擢福建建寧右營游擊邵武營參將福建撫標中軍署理叅將延平協副將閩浙中軍副將時皖匪

竄江右分擾玉山廣豐鉛山逼崇安分水各關朝太偕官紳防堵以餽
糈不給捐鉅款濟之其妻馮亦撤簪珥以助軍實朝太又時出奇兵擊
賊賊驚潰而遁事平論功賞巴圖魯勇號同治三年閩浙總督左文襄
公克復杭州潰賊入閩崇安當其衝要左聞朝太屢卻賊乃大喜保署
福建建甯鎮總兵旋調督標中協副九年再署建甯鎮時崇安等縣齋
匪滋事連陷數縣朝太至捕首逆吳顯灝斬之餘黨悉平以積勞致疾
卒於任赴祭者三百里不絕光緒初詔以戰績事略宣付國史館立傳
朝太老於軍事在行間與士卒同甘苦每臨戰陣輒身先之在崇安時
崇俗尙械鬪兩造每遇族而鬩如駛大敵朝太諭以禍福皆聽命因繫
其生事者懲之自是崇安無械鬪者子振藻附貢生喜堂東河督標右
營把總振苞附貢生振藻別有傳

潘遵啟字右丞原璧次子幼厚重以解經入庠中年失耦不再娶母爲買婢及笄亦嫁之咸同間遭捻匪亂儲資悉燬於火家中落布衣疏食泊如也晚至不能蓄僮僕長孫守廉朝夕侍奉先意承志能得懽心嘗刻家學勿替四字於杖以誡之其後廉應鄉會皆以專經獲售疑有前知者居濱泗河恒患衝決提倡修築捍患禦災一方賴之鄉里遇有雀鼠爭恆乞判曲直每一言卽冰釋素嫻音韻之學爰編韻學指南與門弟子講標射之法故游其門者皆得反切正韻晚年與子從矩孫守廉同應科舉時人榮之生平素友愛日與遵型弟遵敬聚首談往事以爲樂至老不衰年七十有五卒

劉振藻字魯卿朝太子附貢生朝太捐貲助餉移獎振藻福建鹽大使歸省補用後從軍陝甘保鹽提舉銜賞花翎里居與孫如爽冷元輝郭

樹榕創辦保甲又佐上元吳邦賢籌設惠濟粥廠以食饑民又與州人呂慶圻等創設錢業公所所以平市價民尤便之子毓澎增貢生同知銜河南補用縣丞毓衡同知銜直隸候選縣丞

鄭德興字振遠任東河督標中營中軍都司擒匪竄濟寧德興守城百餘日夜不安寢出兵鏖戰數月擒匪潰走敍功以守備升用德興在行間勇於殺賊而待兵慈善軍人咸以鄭善人稱之子學銳官至參將

徐守元字善卿運河營守備咸豐間髮賊北竄攻破五里營守元駐安居晝夜防堵安居之民資以保護

楊麟閣字圖勛武生投河標官至城守營都司巡防緝捕不辭况瘁雖積勞成疾嚴冬寅夜猶必周境巡查卒於任入祀報功祠

李學棧字叔華江蘇候補州吏目以父幼輿殉難江甯同治三年歸東

河督標承襲雲騎尉世職學習期滿以守備用歷署千總光緒年監修濟寧東北隅城工見兵夫餉不足輒捐廉津資督工勤而嚴兵夫畏而德之工堅且速報竣先於他段者旬日河督咨部賞花翎學斌尤嫻文藝善書筆意深得褚薛遺法性極仁慈有寧陽黃幹老幼六口感時疫貧且憊學斌憫之招至厨下延醫療治鄰有惡傳染者速之去斌卒不忍既黃能杖履復典衣資助回鄉里其善舉類如此年六十六卒子壯猷承襲雲騎尉

張士翰字殿臣父義聚精兵法嘗佐嵩武軍幕士翰少有大志從父讀孫吳書輒有會悟後入東河督標咸豐十年捻匪犯濟寧士翰隨營擊賊安居鎮戰甚力十一年調赴嵩武軍轉戰魯豫直皖湘鄂間歷保至參將光緒十三年河決鄭州調統河標各營赴工彈壓工竣賞花翎補

直隸涿州營參將升開州協副將開故多盜士翰擒匪首單泳汰等誅之盜風頓息事聞於朝賞加總兵銜旋調督標中軍副將父老攀轅留至有泣下者二十四年奏調充武衛中軍右翼長兼中軍全軍營務處二十六年拳匪肇亂士翰請督臣裕祿速飭防營搜捕以絕蔓延不納反奪其兵迨各國聯軍至保定官民洵懼乃與鐵路總辦道員孫宗祥同入聯軍阻其行統將賈思爾盛氣待之士翰不爲動厲聲曰衅由拳匪百姓何辜予來特懇保護百姓耳豈畏死哉賈思爾改容謝之民賴以全三十二年簡放四川重慶鎮總兵兼統四川巡防左軍三十四年開縣紅燈教匪起聞警飛飭軍隊搜勦不數日全境肅清宣統元年回籍修墓二年簡放皖南鎮總兵旋調署狼山鎮總兵狼山爲長江門戶梟匪出沒其間士翰督營擒匪首小王才等聲威遠震三年秋武昌事

起江南北次第響應士翰猶以君臣大義曉諭部衆及禪讓詔下僉議推士翰爲通州軍政長士翰淚下如雨力辭之翌日卽買舟北上所部郊送如舊儀歸里後憂憤而卒

劉綦字問渠運河營守備精河工圖繪同治二年以上南險工保游擊七年河決開封掌壩工保副將銜以病歸十一年鄆城侯家林決口丁寶楨中丞奏調往督工工竣賞花翎是年八月復搶險工墜水中寒卒巡撫丁寶楨曹州鎮總兵王振起會題請卹奉旨照總兵陣亡例給騎尉世職賞銀治喪子翔鳳字小渠諸生河南候補縣丞孫鴻鈞諸生潘矩從字景周號佩蘧生而敦敏至性過人補諸生後卽授徒四方恆以不克奉養爲憾歲時歸省輒侍坐終日夜分不忍歸寢竭力供甘旨而躬率子弟殮粗糲一門之內怡怡如也覃精經義合古今諸儒箋疏

擇其當者手抄成帙時以己意引伸之生平精力所萃尤在易義粹精一書匯集京焦鄭王程朱之說而通其郵義例略同納蘭容若書而深博過之同治初捻寇白滕北犯濟寧潘莊當賊衝奉父挈家人辟地荆塚集中道與父相失深夜獨歸求父所在賊縱火焚民居邏者如織出入賊中若忘其險迨得父耗由荆塚迎歸水漿不入口者已三日矣晚歲杜門講學值歲大侵擷蔬屑豆如粥以食饑者諸鄉效之全活甚衆光緒乙亥夏泗水暴漲率村民守隄風雨猝至屹立不稍動隄賴以完由是感疾而卒年六十二鄉人至今稱之子守廉光緒己丑進士河南南陽知縣鄧州知州補用道守序諸生孫復

段樹榛字西圃光緒十一年進士以知縣分湖南親老告近改安徽治婺源潔已愛民有循吏稱丁內艱起復仍歸湖南充發審局讞員矜慎

平充署道州知州州俗刁弊遇命案相驗恆闔於尸場樹榛威懾理諭
奸民稍戢未幾臂疾作請假歸里遂不復出開門受徒邑人士爭趨門
下樹榛與弟子講藝論文娓娓不倦應河督任城書院山長聘文行謹
飭士論翕服先是任婺源時受前任虧三千金流滯皖城孝廉劉世瑋
依助之始得返世瑋戊子分房所得士也旣任道州時卽以世瑋所假
之三千金償還世瑋固不受卒予之時論兩賢之與孟廣來劉保厚夏
如煥齊名有段孟劉夏之目廣來保厚自有傳如煥字星垣舉孝廉後
不數年卒

孟廣來字鏡符亞聖裔自明萬厯間六十一代承魯暨子宏業兩世宦
遊濟寧因家焉廣來光緒二年舉人主講金鄉之山陽滕之道一曹之
居敬各書院纂修曹縣縣志於生徒悉心教授時縣久無科第自此登

河... 卷... 一...
甲乙榜者遂衆旋舉二十四年進士以主事分戶部會庚子兩宮蒙塵
廣來與妻唐約同殉繼知行在所始已和議成感憤改教職歸里補沂
州府教授未及赴任卒時年五十有八

劉保厚字子純一字旨蕤天資英邁讀書有夙慧光緒元年舉人八年
成進士以主事分工部改外官銓授貴州普安縣縣有積盜劉燕飛在
捕中久未獲巡撫密檄限緝保厚偵實所在躬率兵入其窟穴縛以出
巡撫嘉之露章薦剡加同知銜賞花翎調遵義縣兼護遵義府篆會黔
藩被劾諉咎屬下遂罷官歸里居主講任城書院分修脯之半增
益士子膏火並捐款重修北關石路南關橋梁年六十四卒

魏志厚字實堂歲貢生與李仁榮設翰林街義塾兼辦惜字社規畫周
密咸豐十年捻匪犯境鄉民爭人城志厚當門指揮使車馬由中男女

分行人物得無損衆推爲理劇材道咸時兩修州志迭充采訪校對及光緒中知州彭虞孫續修志書復與參校故熟悉邑中故事晚歲家居授徒重游泮水徵詩誌盛卒年八十七子傳緒字紹甫廩生績學能世其業

田汝畚字硯農父奎佑行誼爲鄉里重汝畚弱冠入庠道光十二年鄉試典試郭尙先賞其卷擬元與同官議不合因是落第越三十餘年至同治三年始舉於鄉與及門說經論文力崇正軌游其門者傳習師說鄉人奉爲準繩光緒二年歿門人李仁榮等爲表墓長子育挺字少農光緒二十年舉人大挑以鹽大使籤分福建在閩猶授徒以資生計新舊學者謂爲不失舊矩矱家云

米協麟字瑞符同治元年舉人九年選泗水縣訓導時舉立身經世之

學以勗諸生士風爲之一振十三年會試舉第二名進士以知縣分福建親老告近改直隸李文忠公鴻章方督直大蒙賞拔歎爲幹濟才委辦營務處派赴各屬審訊上控案件逐次清結聲名藉甚奉天將軍奏調順天府尹咨調均不果行光緒二年因海運保直隸州知州補東明縣知縣東明毗連魯豫盜匪出沒號稱難治歲稔羣不逞之徒蠢蠢欲動稟請停徵頒賑金活餓民甚衆又捕獲盜渠朱龍孟三等正法地方賴以安謐旋調補安平未赴任丁內外艱八年服闋選甘肅文縣文處隴蜀之交亂山雜沓風俗刁敝蒞任後因地制宜民安其政俗漸更新旋調平番縣平番爲西甯新疆伊犁饒道番漢雜處搶劫時聞懸賞緝獲匪首馬標等十餘犯始各斂跡駐藏大臣長公過平番詢藏中大計以道路險遠用兵不便宜和平辦理對長公韙其議約赴藏力辭之十

六年調署靜寧州知州旋爲蜚語中傷年中甄別以教職改選歸里後著書自娛不與外事子汝厚附生江蘇候補知縣汝勤廩生汝寬隱居不仕能傳家學

孫柜字方山毓湘子中書科中書截取陝西同知秦撫王文勤公慶雲畀以鐵錢局總辦辭不就未幾大獄興在事胥里吏議人服其先見署甯陝廳通判民好訟柜細心研鞫月餘清積案千七百餘起轄境有五郎關營兵把持公事先與其主將約有犯必懲一軍歛迹補佛坪廳同知地險僻山多盜曰紅簽白晝劫掠廉得其魁杖斃之餘皆長繫四年境爲帖然並獲洋縣盜首大府飭各屬仿其法改署漢陰時嚴查邪教抵任曉諭紳民開以自新之路不戮一人而案結閱訟牘灼知串通架唆之弊飭代書分班值日侍堂隅聽訴者自言言盡呈稿添砌一字立

責之訟家有具稿來者研出訟師某逮至懲之刁風大息旋赴佛坪本任凡漢陰未訊竟之案兩造爭求判結焉膺卓異薦升廣西潯州府知府署慶遠府知府聞父病請告歸養時李文忠公鴻章方駐軍濟寧約之出總理後路糧台東省肅請保道員文忠北上邀之偕行以親老辭遂不出在籍會同紳董辦地方善後事宜慮圩工歲修無出酌留糧炭捐爲補葺積錢二萬發典生息捐乃止平居篤於孝友色養垂二十年封翁八旬壽終哀毀骨立次弟枏季弟楣先卒念之輒涕泗交頤好汲引後進獎拔單寒甯陝張煥堂佛坪李沛霖魏陽其尤著者也子肇燠增貢生陝西候補同知著有意園詩文存稿肇燠廩生肇燕優貢生工書畫著有不能言齋詩稿肇燠廩貢生河南汜水縣知縣鄧州知州著有蔚岑詩鈔

劉錫晉字進之光緒十九年舉人性好學於經史無所不窺而尤熟於掌故時以四夷交侵邊疆不靖錫晉著安邊表海二策侃侃而談獨扼其要其上左文襄公書於馭夷守險諸大端尤能言之鑿鑿人以黑龍江金礦富中土議創設黑龍江織工以開金鑛并請援吉林例設府廳州縣治之其後吉林雖改行省而所議卒未盡施行

李毓恒字冬涵一字勉齋幼嗜學就傅佔畢輒自携四庫書目潛閱具知古今學術派別門徑塗軌因有志存書購書六七萬卷部分類析略述梗概并輯諸家藏書之約成惜陰書屋書目六卷又仿郡齋讀書志例每書抉摘要義辨正異聞箸勉齋讀書記校刊先世遺集濟寧修城知州王恩培邀使毓恒襄役始出預聞地方公事此後積穀保甲修圩修志靡役不從毓恒見國家多故擬仿明季及咸豐時故事寓鄉兵編

制於保甲中而河標綠營積習難改卒輟議又議漢儒何休明議祀鄉當爲建祠故總兵陳國瑞當附祀僧王祠古南池當附祀許主簿南池之祀邦人從其論徐纂州志哀集已刊未刊鄉耆箸作四十餘家邦人之考文獻者多於是取徵焉光緒中葉鄉塾盡易帖括之習購書誦讀風氣轉移自毓恆始卒年六十子三長繼琨字瑤林光緒十年舉人亦嗜讀初從父授經習宋儒傳注繼乃徧讀漢唐注疏及清儒釋經之說探賾鉤沈不憚煩碎性純篤無機械心與人言呐呐不能盡其辭至爲文則綜博刻奧見者瞠目愕詭紛起然多樂與辯質聆其緒論嘗謂治經宜從詩禮入可貫穿羣經尙書眞僞雜廁且虞夏禮制多異不可以周禮強說清儒務拾叢殘致說易曰易說春秋曰難兩經孔子未列入雅言非初學所能究其他零星攷辨如謂小明爲穆王西征時詩鼓鐘

爲穆王會塗山時詩濟寧王母閣爲魏夫人祠之譌聞者不悉解亦不
悉信顧每視所言爲治學門徑循以檢書蓋鄉塾存書無多問學不易
知讀書與習舉業不同自毓恆始知治經有漢宋派別兼須旁徵子史
自繼琨始也中年欲辨章家法自衷一是益肆力於公羊儀禮以家貧
旅食輟業未就主張秋鎮安平書院講席數年評隲改削輒盈卷幅勸
人以讀書治經爲根柢從者多以是知名旋爲一顯者重聘赴山西不
匝月辭去歷遊大同京師歸授徒東平益侘傺好稱述西漢經說而深
惡新學僞經攷尤嫉談時務者遇輒痛斥之學校制更歷任曹州中校
魚臺縣校教員濟寧存古學校高等小校中校校長與共事者多齟齬
而諸生翕然聽受無閒言亦習星卜以六壬占無不驗庚子丁父憂哀
毀嘔血終身不愈癸卯服闋應試自占必售然壽亦不永自傷年甫四

十境困身羸遇事拂鬱無當意者辛亥聞武昌事起病頓劇九月卒無子嗣從弟子爲後著述多散佚不存

劉福善字慶餘均安子道光十一年舉人選授青城縣訓導善繼親志好施予凡戚友匱乏歲給以廩粟而於族人之貧無歸者讓師以居出資以養先是福善有肆在夏鎮濟寧之業炭者咸寄貲焉咸豐辛酉土匪陷夏鎮劫掠一空至是寄貲者俱來責償福善變產償無少吝其待人以厚類如此

孫寶忠字蓋堂號虛舟父皞歲貢生臨朐縣訓導寶忠幼承家學弱冠有聲黌序間道光十五年與族姪春臬同舉於鄉臬亦績學士也文尙樸茂守先正法不敢踰尺寸惜早卒寶忠學邃於易歷三十年不少倦著有讀易知新中多新義集粹一卷尤能集漢宋諸家之大成而折衷

之門下高第均得其緒餘以去族姪如僅親炙之遂爲天下冠冕後以大挑授知縣改教職選臨朐縣教諭喬梓先後司鐸一邑士林榮之曾孫參照歲貢生

孫春泰字履安性孝友尙節義講治生術家稍裕因建宗祠立遠祖墓碑以成先志篤族誼事諸兄恭謹盡禮女兄適黃寡且無子迎養於家爲之請旌入祠同里李某家貧喪子欲出婦心憫之輒出貲以全婦節張某貧而孝母妻喪母老左右需人爲出聘錢俾續娶焉次子聯符字印泉光緒元年舉人權泰安縣訓導任海豐訓導主講金滕二邑書院調任霑化縣訓導其爲學一主於求己凡史鑑忠孝節義事愜心者都手錄成帙攝泰安儒學篆時有貧不能延師者悉招至署中授以課程蒞海豐亦如之一時有安定再見之譽年六十六歲卒著有苜蓿齋文

存切已錄經腴知新諸書孫遵西遵善曾孫啟葆均先後入州庠遵西歲貢生遵善學堂獎勵舉人

于如川字仙舟道光二十年舉人年十五入邑庠旋食餼州牧徐宗幹器重之資以膏火道光己亥鄉試中副車第一庚子闈後宗幹閱其文決爲冠多士是科主司搜房得如川卷遂定解首考官入都覆命宣宗面諭山東元文甲天下故當時咸稱盛世名元先後主講德州安徽泗州盱眙書院庚戌大挑知縣改教職選棲霞縣訓導以敦行立品訓飭士子朔望親爲講解士風爲之不丕變邑有諸生馬桂芳姜鳳梧因貧廢學招至署飲食教誨之不數年皆成進士嘗兼署萊陽招遠海陽縣教諭攝登州府教授同治間捻匪肆擾上官素悉其才檄委協辦棲霞團防繕城浚池守禦以固旣賊圍城如川登陴勉以大義賊解圍去棲霞

有廩生于岸以傳習符咒聚衆劫掠如川乃赴大營請兵中道爲捻匪所阻幾瀕於危卒冒險往于岸聞之懼欲他竄設計誘其黨魁戮之以功保知縣辭改授光祿寺正署銜卒於任著有半竹軒詩文稿十卷玉尺心商七卷子朝勳字書青附生左文襄公宗棠器其才延致幕中多所贊畫旋以刑部河南司主事供職京曹晉員外郎既佐楊石泉漕帥清江節署有屯地訟久未決朝勳親往履勘縷析條分案以清結其父患痰喘病甚朝勳割臂肉和藥進獲痊善醫精數學多奇中先期知卒年月日後果不爽著有寄廬詩文稿季子銘勳字叔鼎同治九年舉人工書法兼通醫理尤重氣誼主講平度書院士論翕然以揀選知縣攝分河辦理災賑立成鉅款先是楚友陳某委妻子濟南出遊數年無音問銘勳得脩金每分與之後爲集貲遣老僕送之歸聞伯兄朝勳歿於

粵嘔血數次明年卒著有碧梧聽雨軒詩文集

蘇質民字靜觀號迂仙同治八年歲貢幼孤事母孝秋闈屢躋貢成均後不樂仕進以著書爲事諸子百家多所研究又精疇人學工書法兼榮擅丹青周易一書尤有心得探賾索隱幾二十載與郡人孫寶忠李仁兩明經齊名晚年頗耽禪悅語多玄妙著有槃鐘錄九種易學象粹合編諸書

李仁榮字少桓號未村光緒九年歲貢精研經學手不釋卷於小學音韻俱能闕其門徑晚年尤邃於易而旁及於六壬嘗襄校孫寶忠讀易知新又專校陳持平讀易觀象凡三易寒暑始歲事所著書有二十餘種伯子爲蘭字芳池光緒十七年舉人治經多所闡發尤邃於周禮工詩古文辭先後主講河南汜水書院金鄉山陽書院及門之士多以經

學顯叔子爲衡字湘九光緒五年舉人博通經學每以所見發爲讜論
先後主講直隸昌黎單縣琴臺諸書院纂修滄州魚臺縣志後以大挑
分發河南時學堂新立任汝寧府中學監督兼法政經學教習及鞏縣
師範學堂經學教習代理羅山縣知縣後謝病歸仍以教讀終身每講
說諸經園而聽講者達數百人著有觀象拾遺搜羅衆說叅以己意頗
有所折衷云季子爲輿附生

余朝梅字調夫籍隸浙江定海先世有官濟寧者因僑居焉祖春暉工
詩其妻氏史名筠字湘霞亦嫻吟詠伉儷倡酬詩名噪甚今所傳蘿月
軒集卽史作也朝梅幼聰慧寄籍濟寧補諸生後與王蘭昇法偉堂諸
名宿同肄業灤源景賢書院爲院長匡公鶴泉所激賞同治十二年舉
於鄉前數日其父病歿捷報至更以爲戚以其父不獲見也塋禮成亦

困臥咯血丁小農觀察重其孝行廩之三年以大挑授朝城教諭於寒士每加意府院省試咸分俸予之或邀與同車共廬飲食教導之月校諸生捐廉獎勵士蒸蒸向學多所造就紳耆咸感之三屆俸滿擢曹州府教授訓迪士子至老不衰宣統初卒於任

高永平字星垣咸豐七年歲歉甚舊田沮洳不足自養然天性好施鄰村南王莊陳姓有鬻妻者已登輿永平出貲贖之俾夫婦如初并按口給糧焉髮逆之亂築砦衛衆輸貲禦災一鄉賴以全活光緒二年歲又不登永平倡議疏濬西泗河以工代賑周巡河干躬親版閘晚邃於醫捨藥拯疾苦親鄰貧無告者周卹無弗至又以朱集爲通衢設肆其間有貧民借貸者不計息兼於其地設義塾植小學之基礎永平素重文學時鄉人潘守廉設教鄉里命四子皆從之游仲子書誥尤以孝友著

聞

袁兆甲字幹初素好義凡善舉無不預咸豐三年修城垣四年修學宮
濬泮池及修文昌祠暨南牌坊西龍門坊胥捐款并親監工程其袁氏
宗祠亦兆甲創建髮匪之亂襄辦義勇局籌備軍需尤著勞動由刑部
員外郎議敘候選道加二品銜子景曜號昫生東河候補同知同治間
祥河廳搶險及滎澤修築石壩功尤最由知府保升道員賜孔雀翎後
署下北同知調黃沁同知卒於任孫長卿字相廷刑部員外郎
熊毓和字介堂少讀書不屑屑於章句之學中年肆力於醫瘟疹傷寒
尤獨有心得庸是有洞垣一方之曰歲活人無算貧乏者尤多造門請
診者無貴賤貧富皆躬親視之貧則給藥貲贈丸散以爲常數十年不
少恡嘗誡人云不爲良相當爲良醫蓋自况云子敬軾字倚龍好施與

於親族尤厚近宗有程氏嫠婦老無依敬軾迎養於家爲其子娶婦並給以負販貲資事畜焉其女兄弟三均早卒各有遺孤一一收養之以迄成立視孀嫂女如已出長適劉氏並以商業屬之不半載耗折並虧累幾於不支敬軾無怨懟遇劉如常又念其姊夫徐及戚屬劉父喪均無貲購地以祖塋側之閒田分給之有尼以風水者弗顧也追夙負其人以驟馬及家中物畀之敬軾曉以農家無耕耨資奚以復業徒手而歸此二事者尤爲人所難焉孫炳瑗炳琦從事軍政界有聲

呂福泰字安卿河南下北同知值鄭州決口福泰竭力督修尅期竣事以知府保薦旋授上南同知轄防工段綿長掃壩林立福泰沿河添設汛房督飭兵丁嚴加守衛又以沿河貧民子弟無力從師自捐廉置義學兩區教之光緒甲午鄭鳳五堡猝生巨險屢廂屢刷福泰露立數晝

夜督工搶險始得保全明年滎澤又出險滎非上南防地福泰不分畛域撥工撥料轉危爲安保奏以道員用加二品頂戴時部議行昭信股票福泰倡認六千金人以爲難能子慶坡諸生歷任懷柔永清平山知縣

呂福恒字藹春附貢生補四氏學教授任滿納貲爲部郎又外選湖北咸豐縣知縣縣地接苗疆風俗強悍福恒恩威兼濟人心格孚旋調任桂楊縣地險僻民健訟每因山場爭界訐訟連年官署又憚於詣驗但憑圖說判斷未能折服福恒躬親履勘多年積案由是而息以觸煙瘴有病告退回省卒子慶堂江蘇金壇縣知縣慶坳河南歸德府通判慶圻以附貢生舉孝廉方正分部郎中

王大猷號顯齋貽京子幼隨本生父貽棻宦遊巴蜀旣其父因病致仕

囊無餘資路險遠大猷竭力屏當又不敢稍露聲色致貽親憂遂隱爲
籌畫行數千里歸侍疾求醫久而不倦性慈善道光辛丑城垣塌損時
州牧徐宗幹勸諭捐修大猷董其役事竣以勞勩獲獎光緒丙子冬歲
洊饑流離頗多州牧王恩培設立粥場大猷慨捐千貫佐其費全活者
衆其有益於地方類如此咸豐改元粵匪北竄捻匪西擾大猷團練義
勇爲西南關倡藉以安堵焉子學澍東河候補同知孫長松鑒古有識
晚年好遠遊凡吉金樂石法書名畫購求尤多曾孫宗駿候選縣丞宗
騫陸軍部主事

潘遵涵字鏡泉父原泗善屬文體弱多病早卒遵涵幼而劬書受學於
鄔晴園夏右臞不事章句有古名賢風先生病歿無子孀婦弱女恃糧
肆以養而折閱多貸負遵涵捐貲助之並爲之經理盡償夙累事鄔夫

人如母復爲嫁其女時論高之咸豐六年春歲稔斗粟千錢餓者載道有婦持筐筥趨趨道左詢之言僑居此夫出無音耗姑老且病不舉火已數日思乞一勺米爲姑供晨膳耳遵涵閱其貧而貸之自是數數來積欠甚多亦忘之矣後有偉丈夫衣冠踵門謝則婦之夫也謂微公則母及妻填溝壑久矣七年歲又稔光緒三年稔尤甚遵涵罄餘糧以濟窮餓及族姻之貧者存活無算居鄰蕭甲設貨於市歲饑耗其貲有祖母年八十餘屢求貸焉歲終負錢無可償舁一笥爲質而封誌特嚴云姑以爲信耳笑頷之無何蓄他徒久無耗啟視之悉瓦礫敗絮也亦一笑置之數年蕭歸謝不自安遵涵更貸錢以資其不足人皆稱爲長者年六十有七卒子矩植精於醫任陸軍軍醫正矩楹綏遠都統

韓寶乾字健元性好施予尤篤於親親從叔銓年老無子失明夫婦無

依迎養以終其天年殯葬如禮復以第三子嗣之族中孀孤廢疾者均
月有廩粟有窮困不能自存歛歔於其側者必詢所苦力爲拯濟晚年
家計窘而善行不少怠凡修橋築路施榑捨醫恤嫠各善舉必多方提
倡之居常茹素精研內典二十年如一日卒時年六十有七子聯基諸
生

黃興麟字瑞庭曲阜籍前志孫懋五世孫事親以孝聞家素封好施與
尤篤於宗族義田義塾其尤著也咸豐七年歲大饑自開倉廩賑濟光
緒二年饑亦如之捻匪北竄軍餉及城工皆有輸助更出貲修築鄰村
土寨凡保衛諸費胥力任之議叙花翎四品銜以同知歸福建候補僧
忠親王又爲專請賜二品封典並獎以仗義急公匾額興麟村居樹上
多烏巢鼯鼠夜緣樹食其雛興麟造木架於杈枒間以護之冬日雪後

布米於場圃以餉饑雀於村外鑿放生池知州周鷗曾作詩美之鄉里
僉稱爲黃善人云子文漢字景舟貢生兵部車駕司員外郎孫慶階廩

貢生歷官冀州知州

以上均
據采訪

濟寧直隸州續志卷之十三

列傳下

許仁字性初世居金鄉許村幼穎異博通經史尤精毛詩後從楊龜山先生遊名見高弟錄中宣和辛丑登何渙榜進士擢監察御史扈蹕南渡拜右朝請大夫集英殿修撰旋命權知臨安府時新都草創仁內撫百姓外給軍糧庶政賴以克舉未幾黃潛善汪伯彥用事仁劾以十罪痛斥其嫉賢誤國疏奏留中而羣奸側目日謀所以中傷之仁遂不安於位聞天台山水佳勝偕修武郎趙士杼往游因並留寓於靈溪坊作思敬堂居焉隨構金波亭於墨湖之上以講學終從游者甚衆著靈溪新紀若干卷年七卒塋龍牙山子行爲大理寺

據台州府志天台縣志增入以下金鄉

秦士奇字庸理又字公庸其先單縣人襄毅公從孫也後徙金鄉性疏

雋少以風節自持明天啓五年進士初宰崑山以拒建璫祠免旋經廷
察事得白補獲鹿時京畿戒嚴以守城援京兵馬足額特調固安治獄
明允不避權貴屢蒙超叙權貴人輒爲阻抑思陵崩投纆以殉遇救而
蘇聞宏光嗣位金陵遂渡江史閣部守揚州延置幕府與應天祥共襄
守禦後副部郎黃日芳督餉高郵明亡隱身不仕當路有招以書者卻
之曰不肖奇呆性拙骨立已三仕雖落拓宦海幸一姓子臣無關出處
邱壑足矣西寇不能禦近官畏之如虎恨無可逃即投纆以付後人及
甦而新詔下頒方幸故主敢不從王追思予以萬厯乙卯薦於鄉天啟
乙丑成進士祖父世受國恩以命蹇初筮仕崑山偶以不辰蒙毛撫臺
王按院檄約虎邱造魏璫生祠同寅州縣有年家通家亦函約助祠蠲
金報名織造府監上達魏璫僕一時倔強未附同寅無不咋舌以爲有

死禍矣及撫按又以檄予魏祠知柱對聯予以語戇獲罪卽爲緘印北門請告病呈撫按不準予將進賢冠付之撫臺角巾舟中且令待罪恐魏璫來索索云云及秋先皇升遐魏敗予始有生歸家載餘灰心功名忽有邸報傳云察出不拜魏祠者加級起補是以予有獲鹿之補秋冬卽虜犯都城予以守城援京兵馬足額奉旨特調固安不意上年劉仲之獄以弟金吾劉僑之刀延緩外訊予又奉旨令將仲雪確擬具奏予罄盡心血保守殘城方爲加級候陞又不意劉僑囑其兄求減死罪未遂遂誣奏違旨而欲殺予反覆至二載七月無迹被遣後三次起廢又特旨得罪廠衛速覆嗣又蒙起未赴今日擒僞之事人人目爲異物我遂出奔雖求盧老止兵非任德免怨求慊此心耳至今去豺狼而進犬羊昔患弱肉而強食今反被髮而左衽矣可笑也亦可哭也東撫當事

者誘言壞人節義予卽葬江魚腹中得爲大明朱家鬼已耳肯苟且以
附功名大節旣虧更言建樹哉已矣無復言矣後以提餉淮安免揚州
之難不知所終

據采訪
冊補遺

李翮字逸翰乾隆三十六年進士由禮部主事擢御史吏科給事中清
謹敢言出爲分巡杭嘉湖道佐巡撫覺羅吉慶裁閩總督公使銀二十
萬兩總督銜之會翮署按察使愚民倡邪教造違禁物翮馳往次第縛
之總督具反狀奏聞且擁大兵至翮白巡撫先馳奏得旨令總督還福
建無妄動乞養服闋改陝西行抵留壩廳募鄉勇拒教匪與鄉勇共甘
苦上下山谷皆單騎厯險阻忍饑渴以積勞得疾歸卒於家

山東
通志

劉苞麗字永川乾隆辛未進士博學多通爲文如不經意而汪洋淵奧
見者以爲思精體大不可攀躋歲試學使者奇賞之特拔爲兗曹濟諸

屬第一名噪甚久人薦不售門下士有售者取其文閱之笑曰來科吉必售矣果以經元聯捷歷直隸甯津蠡縣爲政若從容無事而事自理民不冤後累吏議罷官歸里優游林下以著述終子連培拔貢生滋陽學教諭暉庠生

李鏐字仲修高祖慶寰值明季賊逼定議捐厚資以全危城衆稱爲義門鏐乾隆癸酉科舉人力學澹於仕進久之乃謁選授榮成學教諭歷武定曹州府教授訓士子先行後文矩範肅然其學尤邃三禮及宋五子書常酌古禮爲喪祭婚冠儀式命子孫世守之所著諸稿臨終屬嗣子本深曰謹藏之勿刊也子本深字靜涵事嗣父與本生親皆篤孝能先意成志樂善喜施丙辰水災壬申年大獄癸酉軍興皆悉資力爲排解不居功不尸名與人交一以誠篤以稱人惡爲大戒常曰衛叔寶情

恕理遣之言范堯夫責己恕人之訓先儒或議其疏然與聖人躬自厚薄責人之指合又曰吾讀史慕陳仲弓王彥方爲人愧力不逮耳爲文醇雅一稟先正曰吾不能爲趨時之人亦不能爲趨時之文也數薦不售至嘉慶癸酉以增生欽錫副貢年七十二卒孫壘進士湖北通城知縣自有傳臺增生倜儻好學書法嗜晉早歿墅歲貢生曾孫鴻恩增生張鳴彝字錫範乾隆甲午舉人以知縣分江蘇初署高淳縣知縣數月清積案百餘起聽斷精敏去之日士民遮道皆爲歌詩送之改四川署彭渠補梓潼縣值教匪滋事繕城備械以恩義結紳民三年賊不敢犯奉檄赴軍營辦事賊乘間入境後任依前法拒之城得安全嘉慶丙辰委署射洪縣時全省不靖邑無城兵民寡弱距治二十里有太和鎮俯臨大江糧臺在焉知爲賊所必爭悉力防守徵兵未至乃練鄉勇五百

人依江岸設幕五十一人管十幕晝則積柴蓄烟夜則張燈然火賊不測虛實終未敢渡竟以勞瘁致疑卒時論惜之子鶴慧字筠軒諸生諳究古今嗜詩古文詞有浣衣詞曰衣非帛不煖垢積帛不顯願君勤洗濯勿使垢常掩其自治嚴如此年未六十卒子峙山孫秉環皆諸生李壘字畏嵐道光己丑進士選湖北通城知縣湖北漕收事繁弊多壘親與百姓定斗斛不取羨餘民感之輸將恐後崇陽盜發壘聞警卽募勇守城三日昏夜賊突至率紳勇巷戰移時衆寡不敵城遂陷通城人訴於大府稱其政治清勤乞留乞贖皆不果壬寅西戌輪臺著有新疆小記歷代年號紀略偶然草詩集數卷賜環東歸主講蘭山書院後家居訓子又著四書殊一一卷諸子集語明史紀畧二卷子鴻恩增生李長清字秋溪少豪宕不羈長益堅卓持氣節然一言合輒吐肝膽急

人之難糜頂踵不悔習騎射二十四歲充武庠生嘉慶六年邑有某皂孽息貲豪於鄉希倖進資緣入場與試大譁郡縣吏以苞苴故左袒訟興牧令懼干墨議益爲之關節各司憲衙門至大訟連年不息舉貢廩生增監褫衿頂罹榜掠榔檔繫獄者累累老儒斃囹圄者若干諸紳瓜株蔓連橫被逮捕邑人士憤懣中結近計將上叩九閭而某皂孽賄行當道沿途暗伏刺客至茶寮酒吏市餅賣漿者流多置毒偵伺狹路相要者尤多人苦之長清乃攘袂起曰衣冠塗炭於此爲極我雖武夫亦膠鬲中人若不北上大獄莫解時學使某公差竣入都公問關千里託後車箬簾中得達京師至則銳身詣大理寺三上書事得直諸生以是獲昭雪白撫臬司道下至牧吏均嚴旨褫職學校一肅而長清之名大震後十八年教匪事起知縣吳階游擊海陵阿奉檄捕賊長清聯絡紳

董協畫勦守事宜於是首匪劉西祥李棹立等帖耳就獮論功賜武舉人議敘千總職

孫巽字慶南乾隆六十年舉人性敦樸教授生徒先品行後文藝從游者數百人爲一邑文教宗貧不能學者多收教之戊子修邑乘草創潤色皆巽手輯選樂安訓導數年告歸賦詩鳴琴有隱君子風著有橄餘堂文稿

周葆禾字硯農篤於學駢散俱工耽吟詠長近體道光二十三年舉人由大挑選禹城訓導任滿歸里設教於家門下士登甲乙科者後先相望晚年習說文精通六書凡點畫音韻俱能研究微妙正誤辨訛以津逮後學年七十三歲卒子朗山增生成豐甲寅守城殉難豐山廩貢生孫育樟鉅野營守備育樅廩貢生

尋九苞字儀軒號墨莊道光十五年恩貢嗜學能文樂與後學講論
亶不倦故從遊者日益衆性樂與人爲善邑有義舉必盡力襄助而成
之年逾七十卒

張寄注字介潭咸豐八年舉人邃於性理諸書教授五十餘年甄陶後
進一守先正師法一時推爲儒宗性孝友四歲失恃事繼母以孝聞與
弟始終推讓有古人風初授徒於舅氏家嘗同赴院試舅氏暴疾爲延
醫療治泊場期舅氏促入場佯應之終不入是夕舅病寄注乃拼擋急
歸未及家而舅氏卒撫其遺孤成立之寄注家不中貲然好施予咸豐
七年歲饑推食以濟一方餓者皖匪之亂又捐貲築寨衆得守禦其因
事行惠多類此著有讀史管見嘲談錄

李繼高字詒菴例貢生以德望爲宗人所服有侵爭事往質繼高一言

判決無復涉訟者生平樂善喜施遇貧乏者時其緩急而賙卹之不俟乞假所惠族黨歲不貲然繼高故不豐嘗語家人曰吾少更多難家道中落當咸豐七年大饑無以自活吾雜餓夫中掘草根食之憊甚吾友胡君秉禮哀而憐余餽菽若干以有今日此恩誠不可忘夫施不在多貴濟急吾嘗以此盟心不敢負胡君故也汝曹志之又曰吾節縮浮費以供施予而家日興汝曹或反之貧道也時人以爲至言

牛金壘歲貢生性豪爽有古俠士風偶出門見有過車飆駛一少婦奮身投車下踉蹌呼救村內人集視莫之識詢所自曰吾戴氏女嫁單邑爲李門婦夫亡守志數年矣今母家車迎我途聞知有詐故拚死以全節願老父急救我金壘聞之曰有我在無恐指車上人曰若輩苟恃橫逆且鳴諸官其人懼而退蓋御車者卽其兄賺氏再嫁者也遂隨金壘

泗水縣志卷之十一
歸及金壘夫婦歿氏衰蔴執喪視之如父母云

閻淑立字晴川咸豐十一年拔貢生考取國史館謄錄有同年生方臨莊歿於旅寓經紀其喪賙恤備至先是應同鄉張某之聘至杭州未幾張歿宦橐蕭然淑立爲文以告僚友醵金賙贈而後旅櫬得歸其慷慨好義多類此光緒五年始舉於鄉年已五十餘矣卒年六十有三子滋拔貢生渥歲貢生

張春闈歲貢生性肫篤綜理族務族姓敦睦董一方事一方息訟邑令蔣以其事聞於大吏大吏奏請授國子監學正晚歲息心澹遠泊然於聲利之外耽吟詠有東臯課草若干卷藏於家年八十九卒

李奉耳字龍卿廩貢生善爲詩清新如庾開府尤好義舉凡掩骨集義等社邑人必推奉耳董其事監理山陽書院數年士子多所矜式兄奉

茲字念堂翰墨摹劉石菴人爭寶之子若巔拔貢生

孫維檀字香車歲貢生性寬緩平日無疾言遽色其戎子有云涉世以和平爲要和平足以造福弭禍足以養身心汝曹勉爲之生平嗜讀書手不釋卷習舉業外於經史子集靡所不窺咸豐初兵燹饑歉交并維檀率幼穉挑菜作羹而誦習自若年三十六遭母憂咯血成疾幾至滅性年八十二卒子越歲貢生

李于福字幔亭庠生性恬雅與人無競嗜翰墨竟夕臨池無倦容摹臨背撫惟步趨劉文清公清愛堂一帖久之得其三昧至今寸楮零牋猶爭相寶翫云

周欽霖讀書聰敏五經皆能倍誦比長習制藝思如湧泉年二十入邑庠應歲試名冠曹偶弟子欽其學行從者甚衆欽霖善於啟迪以是多

所陶就後試用訓導署臨朐訓導再署東平州學正年七十一卒

周械峩字我山一字柳橋性端嚴有志操爲文入韓歐堂奧然積學數
奇竟以明經終事親孝嘗教授於外一日父遘疾心忽焦灼急歸省而
病卒不起母氏張亦相繼卒時因寇警葬未能如禮後言及輒流涕家
貧廉介自持取予纖芥無所苟值歲數歉率子輩挑菜裹腹晏如也戊
午皖匪滋擾邑城械峩徒步走數百里稟大吏乞示城守方畧獲賜金
資以繕樓櫓募丁壯又手著守城條規設局分理用是人有固志邑城
無恙皆其力也辛酉邑紳李壘纂邑乘械峩捥摭故實多所勸助教人
先行後文時以儒先義法相啟迪故門下士皆斤斤自守無蕩軼繩墨
者治家嚴而有法長幼衣食均有常度邑多取以爲則年八十六卒子
益元候補縣丞貞元歲貢生孫躋昕恩貢生

周澂字湛甫涇州知州兆錦季子也以明經選范縣教諭在任三年修書院籌膏火文風振足性喜施予生徒假貸者無弗應及病革悉焚其券卒於任咸稱爲有古人風護送靈輦至家者數十人

周薰嶺字香岑性嚴正周氏故有家塾後經喪亂漸荒廢薰嶺悉力整頓多所成就復修邑中書院創造考棚數十楹監院開課一時登賢書成進士者後先相望士林稱盛德焉

張晉樞字星一光緒十九年副貢以州判試用河南委監洛陽粥場盡捐差薪以濟餓者二十五年辦理新安官礦復捐金賑濟全活饑民無算三十三年委辦密縣煤釐局時有委員方某借開礦新章徇密商領照且索賄商大譁訴於晉樞稟撤方某並極言密窰不便領照狀辭甚剴切卒得請民皆感德三十四年調陝州州判密商走大府籲留未允

州判治朱陽鎮轄境遼闊晉樞興學校捕盜賊誠心愛民時與吏民之秀者賦詩唱和羣情大洽朱陽東境與內鄉接壤內鄉西鄙至朱陽僅數十里至縣幾三百里或赴朱陽訟曲直晉樞不忍拒立予判結以爲常內鄉令聞之厲書致謝陝俗有放火燒山事諭止之並移書鄰封嚴禁去之日百姓遮道祖餞數十里不絕有泣下者著有詩草二卷宗法渭南士林傳誦之

李永和字春煦弱冠入武庠故事新入文庠者縣令具鼓吹親送之武則否永和耻不與遂發憤讀書未幾復舉博士弟子員文譽大噪以縣丞發江蘇補用歷任山陽縣丞署江都贛榆知縣發奸擗伏所至以能吏稱尋因病去官卒於家

楊鳳翔字瑞周光緒二十九年進士分江西補信豐知縣以親老未之

任後調署萬年自奉甚儉或以爲言歎曰吾志切祿養而親不逮儉所以自罰也時新政繁興公款無措鳳翔慮生事擾民權緩急與時弛張不阿上官意在任無赫赫之名而民陰受其賜卒年四十有八

李奇峯饒於貲第宅甲一鄉咸豐甲寅髮逆竄至奇峯家據廳事閉門堅守州牧黃追至思以火攻而惜其廬舍奇峯慨然曰但能殺賊除害他非所惜也牧乃縱火焚之賊殲焉以奇峯事請議叙軍功後補南匯縣丞在任數年有政聲以弟曉峰歿棄官歸里卒於家子上箴庠生李滋茂字劍泉候選巡檢事繼母以孝稱遇諸弟友愛無閒儉自奉而好施予假貸者無弗應有相識者衣單寒向之求衣猝無以給遂解其袒服與之嘗暮歸遙見有人伐其樹乃迂道還人怪之曰盜樹者必比鄰貧人若衝見之彼旣慚赧無地我亦難於措詞奚若避之爲愈乎其長

河東正系小紀元 卷一 三
厚類如此子其相庠生

周琳字梅坡以巡檢分江蘇歷官丹徒荆溪華亭陽湖諸邑有廉聲子
袞字堯輔幼穎悟工詩古文詞以經歷官浙江歷四十餘年大吏履新
多就諮詢寮友無不敬服後卒於浙子德懷迎櫬歸浙省官紳奠送十
餘里

張西銘字右箴武庠生以孝友聞一切調貧窮恤老疾息爭訟藉藉人
口閭鄉重之立碑以誌不忘年七十一卒子景巡諸生效巡舉人孫淑
韶武進士

朱振國字輔臣同治元年僧邸南征宿其家供給糧芻所費不貲王義
之四年倡義築寨以衛桑梓其後歲值大稔一村百數十家多不舉火
振國開倉濟之孫衛宸武舉人

辛登魁字冠斗武庠生候選都司父廣濟性儉樸好行其德性方嚴登魁少侍側有小過輒加叱訶或盛怒必長跪以請得解乃已仲兄耀峯中年卒遺子錫銘甫再周登魁令與已同居稍長延師受讀至錫銘受室入庠後乃異居辛氏本邑中望族登魁倡族人立宗祠明祀事修族譜嚴教約擴充祭田以裕歲祀金鄉地處東省邊陲咸同後迭經髮捻會匪之亂兵事徵發爲往來孔道舊嘗取民車以資輸送邑人共議長策分五十四方按畝出貲雇民車以應役周而復始而以團長董其事行之既久胥吏每因緣爲奸登魁理團務四十餘年無纖毫累里中有粉榆舊社每遇公務殷繁同鄉輒集長老會議登魁必諄諄以和隣里息爭訟爲人勸數十年附近各村無起釁構訟於公庭者鄰里或有不舉火者向之假貸無不立應年八十卒

辛邦鐸字振卿以縣丞分發皖省補合肥地衝煩多巨紳號難治鐸至則絕請託禁苞苴署舊有二黠役不數月皆潛蹤去中日之役失事員弁衛汝成趙懷業奉命查鈔鐸當官執法指物登籍纖毫歸公上官深爲嗟異丙申秋山水暴發城中水深數尺人民多升屋以居田廬漂沒無算鐸首請於府縣設法賑卹復捐廉爲之倡紳民感奮踴躍輸將不數日而貲畢集災民咸受實惠前後在官五年輿情愛戴以母老終養歸先是未歸時濟寧段樹榛以進士宰婺源丁繼母憂因庫欸留滯不能奔喪邦鐸傾囊中金悉贈之而別假貸以成行竟郡龔某同官皖省相友善鐸以事赴都龔適病歿龔家人欲待鐸經紀喪事以鐸在都日久不及待擇日安厝喪甫出城而鐸至聞龔喪未及返直至柩前哭泣盡哀人以張范比之稱爲山陽死友云

李尙節字雪筠父清耀河決盤龍集邑中大稔出積粟救饑民全活無算里黨以善人稱之尙節穎異嗜書善屬文以嬰世亂乃兼習騎射爲折衝禦侮計性慷慨好施與遇人急難輒傾囊相助咸豐甲寅髮逆北竄人皆避亂入城尙節則視官軍所向展轉徙避城陷邑中望族多及於難而尙節一家獨完人以是服其先識明年擒匪大作助縣令修城繕守輸家財佐工有汶上秦姓女被賊掠以病棄諸途尙節救歸後又爲無賴子劫女去復追還訪得女父挈女去以軍需報効同知分東河首挑柳河東溝消弭水患大吏委辦甘肅捐務得獎花翎河決侯家林東撫丁文誠公調與其役保四品封典城武智姓因納稽受誣禍且不測尙節約同官力白其冤事解終不令智姓知光緒丁亥河決鄭州調歸德辨霖因改分開歸道有餘杭生孫樾赴汴途中誤結賊侶尙節詢

知其故乃携至汴泊生歸籍臨別贈公詩云孺子無知將入井主人雅量許同車汴人至今傳頌之補下北河同知調署衛糧通判修防爲諸廳最歷保在任候補道二品頂戴在任八年卒年六十有八河工舊有助喪之例半出河防局半出各廳攤款尙節以事不合義遺囑勿受議者避之

趙惟一 字吉人 歲貢生 幼嗜學 長而彌篤 以植品爲先 務動靜 必依禮法 其爲教 亦先行後文 弟子薰其德 皆恂恂謹飭 晚歲修族譜 置祭田 設立條規 且面爲勸諭 故人皆觀感 十餘年 無投牒公堂者 卒年七十 有六子 升甫 謹甫 均諸生

尋與炷字炬煨 軍功議敘 五品銜 輕財好義 咸豐時 皖匪屢警 舉辦魚坨 方團練 輸重貲 三千金 築砦一方 賴之 卒年七十 有一子 光第 字錫

之增生好善樂施有父風光甲光墀均貢生光科附生孫鏡候補守備尋龍闈字雲從光緒二十五年恩科武舉明年聯捷進士授二等侍衛丁酉會場外監試官宿衛十餘年以恪謹稱同僚咸敬之庚子德宗西狩回以扈從勞擢直隸墻子路都司在任兩次奉詔引導大行東西二陵擢遵化州游擊後見國事漸不可爲憂憤成疾卒年四十有九

孫世英字芸香性端嚴暗室危坐如對神明有好戲狎者遇之皆斂容自戢尤好施予值歲饑上發帑藏人皆於戶冊冒增口數吏胥亦勸世英爲之世英力辭領學糧歸道遇羣丐散之立盡與人談儒先格言亶亶不倦年三十七卒人咸惜之

周于涵字容谷父獻璋字璽堂嗜古工書施貧者鬻之以濟饑寒于涵幼勤學同治十二年舉人以守城功保知縣加五品銜遭母喪服闋遂

無意仕進管理周氏宗祠修譜牒廣祭田爲邑人所取法族有忿爭不
決來質者輒詳爲剖晰寓懲於勸咸解釋以去以是投牒公庭者絕少
卒鄉人私謚爲孝毅先生著有十三經集字點畫音義略八卷古文集
三卷子貽樾拔貢貽柄廩生

周于灝字秋舫廩貢生候選訓導于涵弟縣試舊無號舍臨時則幕席
爲之于灝糾邑人創建考棚逾數十間尤以書院爲培養人材地葺而
新之鳩貲增置會田二十餘頃膏火之贍甲於諸邑生徒咸歌頌之子
詒楷廣東恩平知縣詒梓庠生從弟子澂字星槎績學能文

李步沆字幼匏光緒二十一年進士以主事分刑部提牢洊升掌印員
外郎有大獄則執法如山勢要不能干以私宣統三年以大局阽危憂
憤而卒著有荷軒詩草二卷文集二卷學書韻語一卷談藝一得一卷

周杰字偉度廩貢生鄉飲大賓本生父肇灃試用雲南鹽大使將赴任卒時杰未成童也嗣父居長旣早卒仲父以城守殉難至是生父又歿一堂三節母孝養萃於一身奉事如一嗣母偶患手癱杰朝夕撫摩曰何不移我撫弱弟二人友愛尤篤時家徒四壁奮志讀書補博士弟子員旋食餼工詩古文辭授徒四十餘年成就甚多著有裕後堂集門人私謚曰懿靖先生子迺誦歲貢

以上均據采訪冊

杜效尹字任風廩膳生事親孝母有疾親侍湯藥不假手左右咸豐四年捻匪猖獗各村皆築寨自守效尹於范山倡辦團練與衆同甘苦及匪至效尹從容畫策以大義誓於衆而卒賴以全同治六年河決襄辦

工料尤有工

以下嘉祥

張煇字雨帆前志嘉峪關巡檢洽孫陝西甯羗州恒寶子諸生納貲選

萊縣教諭調德州巡撫丁文誠公學政黃體芳均重之奏保以知縣用分直隸補昌黎任滿請假歸煬工書善繪於醫理尤精作詩不存稿年三十五始稍存之名之曰古稀得半集年七十卒子之緒字柳如工白描仿李龍眠孫珍裕更名鈇升字聘卿均善分書

梁工求字荆璞歲貢生善草書散見於石刻者甚多官利津訓導著有四書通典行世卒諡文惠先生

梁祖成字世貽江蘇碭山縣知縣其道曾孫讀書過目成誦稍長能文工書光緒十年選拔貢生授陵縣教諭創立義學凡貧不能習業者傾私囊助之

梁光輿字坤一歲貢生工詩古文詞會修邑乘邑侯屬以筆削褒貶紀載一本於公至今據爲信史

高金榜字蕊齋咸豐初髮逆爲亂金榜指臥龍山語人曰此天然要隘據一而守之可以無恐鄉人是其言糾衆結寨其上後賊屢至其境未能犯同時有增生張振江附生郭興禮劉楷武生宋倫秀均辦團禦賊有聲

王秀升字晉卿歲貢生同治間皖匪攻城官紳束手秀升夜率壯士縋

城毀賊壘城賴以完

縣志

馬邦舉號臥廬魚臺人嘉慶十年進士任曹州府教授博極羣書壯游江南厯館蕭宿諸州縣及官曹郡從學益衆著有周易毛詩春秋三傳攷略竹書紀年古史說文毛詩及兩漢魏晉字聲攷略子星房星翼嘉慶二十四年同榜舉人星房字伯府嘗主曲阜玉虹樓講席樓中收藏圖書甲於東省星房晝夜披覽學大進嘗仿唐人初學記宋人通志類

集名物一洗時學簡陋之習

以下魚臺山東通志

星翼子延淇歲貢生精輿地之學

著有山東地理志

王岱雲字變斐恩貢生家貧嗜學嘗著論孟淺說及周官旁訓唐詩解等書先是每攷試士子都集縣署屢議建學舍以費絀未果岱雲與崔子鈞諸人募錢五千餘緡以其半購建湖陵書院餘款生息爲膏火資並於院東偏創修箭道改築武廳又以大成殿兩廡圯釀金重修鳩工庀材閱三月竣事書院經費不足持久適任團涸出湖荒地二十五頃爲強有力者攫去岱雲力爭之卒撥作課田而書院經費始裕其有功學校如此子玉相光緒乙未進士玉年諸生與岱雲經理書院者有劉樹楠字黔山歲貢生

馬擢蘭字紉秋咸豐十年拔貢至性過人以母病不應朝考人咸以純



孝稱之

梁雲仙字汝霖恩貢生試用教諭性孝友好施佐邑紳王岱雲建書院修覺宮光緒間挑萬福河後又倡立社倉活人無算鄉里德之

劉鏡字月橋附貢生東河試用通判光緒間主修縣志探討考訂不厭其詳於金石藝文疆域水利搜羅尤富百餘年之文獻賴此而存性素澹泊不喜虛名宣統紀元舉孝廉方正不應徵弟金緘字慎三恩貢生候選州判子樹檳拔貢生

劉鳳閣字麟書廩貢試用訓導性孝友家貧力學咸豐九年皖匪亂倡義築砦練勇爲一鄉保障修書院縣志尤身任其勞

馬巖字岱岳兄附生崑書畫擅名巖幼讀時背師摹其畫及篆隸書旋棄帖括訪齊楚吳越諸名勝藉展胸中邱壑穀亭文昌閣旁設義塾其

父在榮創之後傾圮巖繼先人之志結社議修躬親督察自始迄竣無
倦容今改設學校後世咸受其賜沒後藏其畫者尺幅重如拱璧同時
楊方增字益泉附生亦善書得王褚之法子凝釗廩生孫懋淫附生

采訪册

